

# JNUHUN VAHA NI TEE SAN MARCOS

## Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

**1** Yāha quéjéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

<sup>2</sup>Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri  
cosnūú de ichi núú rō,  
návāha coo tūhva ñayuu jeē  
jinú rō, achí Yaā Dios jíín  
Cristo.

<sup>3</sup>Te tēe ún cana jee de nde nuū ñūhun téhé:

Sátūhva ró máá ró jijnáhan ró,  
chi quee maá Jítóho yō.  
Te sáha ró jniū ndaā, chi vēji  
ya, achi de.

Achí Isaías. <sup>4</sup>Te Juan ni jinū de nde nuū ñūhun téhé, scuándute de ñayuu. Te cáhán de jíín i jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i. <sup>5</sup>Te tāca ñáyuu región Judea jíín ñáyuu ñuu Jerusalén, ni quiijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

<sup>6</sup>Te sahma ñūhun Juan cúu ixi camello, te núhni ñin cinturón ñiñ chíji

de. Te jeē técu de cúu tíca ndicuéhyí jíín ndúxi yocō. <sup>7</sup>Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuítì cúu ri nuū yā, ni jeē cuajníñu ri nuū yā vēsú ñin jniñu lúli gá nájñūhun jeē cuíta ndeyi ri ndají rí correa ndijēn yā. <sup>8</sup>Te ruhū chi jíín ndute scuándute ri rohó jíínáhan ró, te Yaā ún chi nájñūhun jeē scuándute ya rohó cúu jeē cuáha ya Espiritu Santo condee ini anuá rō, achí Juan.

## Jeē ní jendute Jesús

(Mt. 3.13-17; Lc. 3.21-22)

<sup>9</sup>Te ni cuu jecu quivī, te Jesús ni quenda ya ñuu Nazaret ndañúú Galilea, te Juan ni scuándute de ya ini yūte Jordán. <sup>10</sup>Te ná ni quenda ya nuū ndúte, te ni jito ya jeē ní nune-ni andiví, te ni cuun Espiritu Santo ni quee xini yā, te cáa nájñūhun ñin paloma. <sup>11</sup>Te ichi ándiví ní cahān ñin jnūhun:

Máá ró cúu Sēhe ri jeē maní ndasí rí jíín, te yōhyo cúsiñ ni rí jíín ró, achí.

## Jeē ní jito ndee jexeén Jesús

(Mt. 4.1-11; Lc. 4.1-13)

<sup>12</sup>Yūcuán na te ni jinū Jesús nde nuū ñūhun téhé ní sáha Espiritu Santo. <sup>13</sup>Te uū xico quivī ní condee yā nuū ñūhun téhé un núú ñin quiti yúcu.

Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejníñu nuū yā.

**Jeē ní quejéé Jesús nácani ya jñūhun**

(Mt. 4.12-17; Lc. 4.14-15)

<sup>14</sup>Yūcuán na te ná ni cachune de Juan vecāa, te ni jinū Jesús región Galilea, nácani ya jñūhun vāha ndese ndácu Yaā Dios jniñu. <sup>15</sup>Te ni cahān yā:

Je ni jinū quivī, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jínáhan ró, te candíje ró jñūhun jeē jnāma ya rohó. Achí yá.

**Jeē ní cana ya cuūn tēe jnī chācá**

(Mt. 4.18-22; Lc. 5.1-11)

<sup>16</sup>Te jíca Jesús yumar Galilea cuahān yā. Te ni jito ya nuū Simón jín nani de Andrés. Te tēe cájni chācá cácuu de, te cásinga de ñunu de ini mar. <sup>17</sup>Te ni cahān yā jín de:

Condiquin ruhū na quihín yō, te nasáha ri rohó tēe nihin cuehē ñayuu candíje ruhū, nájñūhun cánihin rō chācá, áchí yá.

<sup>18</sup>Yūcuán na te ni castóo-ni de ñunu de, te ni candiquin de ya.

<sup>19</sup>Te ni jica ya jecu gā, te ni jito ya nuū Jacobo jín nani de Juan, sēhe Zebedeo, suni cáyucú de ini barco de, cánachijnī de ñunu de. <sup>20</sup>Te suni ni cana ya de jeē cóndiquin de ya. Te ni castóo-ni de tátá de Zebedeo ini barco un jín mozo de, te ni candiquin de ya cuango de.

**Jeē ní quenehen ya tachī ini ñin tēe**

(Lc. 4.31-37)

<sup>21</sup>Te ni jinū yā jín de ñuu Capernaum. Te quivī ndétātu ní

quivī ya ini vehe ñi sinagoga, te ni steén yā jñūhun. <sup>22</sup>Te ni canaa ni ñayuu ni cajini i jñūhun steén yā. Chi ni steén vāha ya nuū i, chi máá yá cúu jeē ndíso jniñu siquī ndihí. Te tēe cástéén tutu ley Yaā Dios, tu súcuán cástéén de. <sup>23</sup>Te ini vehe ñi sinagoga ñuu un íne ñin tēe jeē ñūhun tachī ini. Te ni cana cóhó de:

<sup>24</sup>¿Naun vēji ní núu na jínáhan ná, Jesús ñuu Nazaret? ¿A vēji ní jéé snāá ni sáña, chí naun? Je jíní na ndé ñin cúu ní, chí Sēhe ñi Yaā Dios cúu ní. Achí de.

<sup>25</sup>Te Jesús ni cahān xeēn yā jín tachī ún:

Casi yuhu ró te quenda ró ini de, áchí yá.

<sup>26</sup>Te tachī ún xeēn ni jehni yíhí tēe ún. Te ni cana cóhó, te ni quenda ini de cuahān. <sup>27</sup>Te ndihí ñayuu ni cayūhí i, te cácajnūhun jnāhan i:

¿Na vé cúu jeē yáha? ¿A ñin jñūhun jéé cúu jeē yáha? Chi tēe yáha cújéhnu de jeē ndácu de jniñu nde nuū tachī te quéndacoo, áchí i.

<sup>28</sup>Te yachī ni jitē núu jñūhun Jesús cuahān ní cáhnu región Galilea.

**Jeē ní nasávāha ya naná chisó Simón Pedro**

(Mt. 8.14-15; Lc. 4.38-39)

<sup>29</sup>Te ni quenda ya jín de jínáhan de ini vehe ñi sinagoga. Te Jesús ni jehēn yā jín Jacobo jín Juan nde vehe Simón jín Andrés. <sup>30</sup>Te náná chisó Simón, cátu ña yíhi quiji ña. Te ni cacastūhún de nuū yā jeē huhí ña. <sup>31</sup>Yūcuán na te ni quindehe ya nuū catú ña, te ni jniñi ya ndaha ña, te ni ndonehen ya ña.

Te ni quenda-ni quiji ún ña, te ni sáha ña jeē ní cayeji de jíin yá.

**Jeē ní nasávāha ya cuehē ñayuu**

(Mt. 8.16-17; Lc. 4.40-41)

<sup>32</sup>Te ni queē niāndii te ni cuaa. Te ni quecoo ñayuu jíin táca ñayuu cácuḥū jíin jéē nūhun tachī ini. <sup>33</sup>Te tāca ñayuu ñuu un ní cacutútú i yéhyí un. <sup>34</sup>Te ni nasávāha ya cuehē ñayuu cácuḥū tǐjni nuū cuehyí, te ni quenehen ya cuehē tachī un cuángoo. Te tachī chi je cájini un yá, te tu ní jéhe ya jnūhun jeē cástūhun ndé iin cúu ya.

**Jeē ní nacani ya jnūhun región Galilea**

(Lc. 4.42-44)

<sup>35</sup>Te nehen ndasí ní ndonda ya, nde yínee gā. Te ni quenda ya cuahān sǐin ya yatā nūū nuū tú ñayuu, te yūcuan ní jicān tahu yā. <sup>36</sup>Te Simón jíin tēe cáhiin jíin de, ni jenanducú de ya. <sup>37</sup>Te ni cananihīn de ya, te ni cacahān de jíin yá: Tāca ñayuu cánanducú i níhín, áchí de.

<sup>38</sup>Te máá yá ni cahān yā:

Sa suhva na quíhín yō tāca gá ñuu íne yajni, návāha suni nacani rí jnūhun nuū i, chi jeē yūcuan ní quee rí. Achí yá.

<sup>39</sup>Te súcuan te ni jica cuu ya ní región Galilea, ni nacani ya jnūhun ini vehe i sinagoga táca ñuu, te ni quenehen ya tachī ini ñayuu.

**Jeē ní nasávāha ya iin tēe ndóho cuehyī stehyú**

(Mt. 8.1-4; Lc. 5.12-16)

<sup>40</sup>Te iin tēe ndóho cuehyī stehyú, ni quee de ni jecuiñi yití de nuū yā, te ni cahān de jíin yá:

Jíni na jeē cuu sáha ní jéē nduvāha ná, te núu cúni ni, áchí de.

<sup>41</sup>Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúni rí. Te na nduvāha ró, áchí yá.

<sup>42</sup>Te ná ni cahān yā súcuan, te ni nduvāha-ni tēe ndóho cuehyī stehyú un. <sup>43</sup>Yūcuán na te nátají yá de quinhun de, te ni cahān níhin ya jíin de:

<sup>44</sup>Ma cáchi cuiti rō nuū ní iin.

Chi quisteén rō maá ró nuū sutú, te condahá ró jeē socó rō nuū Yā Dios siquī jeē ndúndoo ró núu yā, nájñūhun ni ndacu Moisés jniñū jenahán. Te súcuan te cuni ñayuu jeē ní nduvāha ró. Achí yá.

<sup>45</sup>Te ni quenda de cuahān de, te ni quejéé de nácani de jnūhun nuū ndíhi ñayuu ndese ni nduvāha de. Te siquī yūcuan tuá ni cúu quiví Jesús táca ñuu, chi cúchitú ndasí ñayuu nuū yā. Te ni jica ya yatā táca ñuu nuū tu cúchitú ñayuu. Te tāca lado ni quijicoo ñayuu nuū yā.

**Jeē ní nasávāha ya iin tēe ndóho cuehyī ni íjin**

(Mt. 9.1-8; Lc. 5.17-26)

**2** Te ni cuu jecu quiví, te ni quiví tucu Jesús ñuu Capernaum. Te ni cajini ñayuu jeē néne ya vehe. <sup>2</sup>Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yā Dios nuū i. <sup>3</sup>Yūcuán na te ni quecoo cuūn tēe nuū yā, cándiso de iin tēe ndóho cuehyī ni íjin. <sup>4</sup>Te tu ní cúu quivícoo de nuū yā siquī jeē chitú ñayuu. Te ni cacao de siquī véhe, te ni canune de ndaā nuū íin ya, te yaū un ní cascúun de tēe cúhú, cáttú de

nuū ñin camilla. <sup>5</sup>Te ni jini Jesús jeē cácanđije de jeē cúu nasávaha ya tēe cūhú un. Te ni cahān yā jíin tēe cūhú un:

Séhē, je ñne cáhnu ni rī nuū tāca cuéchi ró, áchí yá.

<sup>6</sup>Te yūcuan cáyūcú jecu tēe cástéén tutu ley Yaā Dios, te tēe un ní cajeni ni de siquī yā: <sup>7</sup>¿Naun cáhán tēe yáha súcuan? Cáhán de jnūhun ndevāha jeē quití ni Yaā Dios, chi nasūu Yāā Dios cúu de jeē cóne cáhnu ni de nuū cuéchi. <sup>8</sup>Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? <sup>9</sup>Jeē úu jnūhun yáha, ¿ndé ñin yíí gá cáa? ¿A jéé cahán rī jíin tēe cūhú: Je ñne cáhnu ni rī nuū tāca cuéchi ró? ¿Chí yíí gá jeē cahān rī: Ndocuññi te naquihin ró camilla rō, te caca ró, achi rī? <sup>10</sup>Te vijna te na stéén rī jeē maá rí, Yaā ní nduu tēe, ndíso jniñu ri ini ñayivi yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni ñjin ún:

<sup>11</sup>Cáhán rī jíin ró, ndocuññi te naquihin ró camilla rō, te quinhun rō vehe ró, áchí yá jíin de.

<sup>12</sup>Yūcuán na te ni ndocuññi-ni tēe ún, te ni naquihin de camilla de, te ni quenda de cuahān de, jíto jínúu ndíhi ñayuu. Te ndivii i ni canaa ni i cájito i, te ni cacahān i jeē yóhoyo vāha Yaā cúu Yaā Dios. Te áchí i:

Ná tu coto cuiti yō ni ñin jniñu súcuan, áchí i.

### Jeē ní cana ya Leví

(Mt. 9.9-13; Lc. 5.27-32)

<sup>13</sup>Te ni quenda tucu ya cuahān yā nde yumar. Te tāca ñayuu ni

jinūcoo i nuū yā, te ni steén yā jnūhun nuū i. <sup>14</sup>Yūcuán na te ni yáha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuññi de, te cuahān de jíin yá.

<sup>15</sup>Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásaaha cuéchi, suni cáyūcú de cáyeji de staā jíin Jesús jíin tēe cáscuáha jíin yá, chi íyó cuehē de jeē cándiquīn de ya. <sup>16</sup>Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndíhi tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásaaha cuéchi? áchí de.

<sup>17</sup>Te ni jini Jesús, te ni cahān yā jíin de:

Ñayuu cáhiyo váha, tu jíni nūhún i tēe tájné, chi ñayuu cácuahū cúu jeē jíni nūhún. Te ruhū nasūu jéé véji ri cana ri ñayuu tú cuéchi, jeē cúu i nájnuhun ñayuu cáhiyo váha. Chi sa suhva véji ri cana ri ñayuu cáhiyo cuéchi, jeē na nácani ni i te stóo i cuéchi i. Áchí yá.

### Jeē ní cacajnuhún de ya siquī jeē cóndite ni

(Mt. 9.14-17; Lc. 5.33-39)

<sup>18</sup>Te ni cuu ñin quivī jeē cáhiyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahān de jíin Jesús:

Tēe cáscuáha jíin Juan jíin jéé cáscuáha jíin grupo fariseo, tíjni

jínu cáhiyo ndite ni de. Te tēe cáscuáha jíin máá ní, ¿naun tu cásaáha de súcuan?

<sup>19</sup>Te ni cahān Jesús jíin de:

¿A cuu condite ni de níní jéē iyó rí jíin de? ¿A cuu condite ni ñayuu cáhiin vico nándāha, te núu níní néne tēe nándāha? Chi núu néne tēe nándāha, te ma cúu condite ni i. <sup>20</sup>Te quee quivī jeē cújiyo tēe nándāha, te quivī ún chi condite ni i.

<sup>21</sup>Te ni cahān yā uū jnūhun yátá síquī jeē tu quíjnāhan jnūhun jeé jéē steén yā jíin táca jnūhun jenahán. Achí yá:

Ni iin tu náchuhun iin pedazo sahma jéé núu iin sahma túhú. Chi núu súcuan te ndiyyi pedazo jeé un, te tahndē gā jeē tuhú un, te nducáhnu ga nuū cátáhdé un. <sup>22</sup>Te suni tu cáchuhun vino jeé ini ñií túhú. Chi núu súcuan te vino jeé un ndatá ñií ún, te naa vino jíin ñií. Jeé yúcuan cánuú jéé chúhun i vino jeé ini ñií jéé.

### Jeē ní cataxín de yoco trigo quivī ndétátú

(Mt. 12.1-8; Lc. 6.1-5)

<sup>23</sup>Te iin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá, cájica de cuahān de, te ni quejéé de cátaxín de yoco trigo cáyeji de. <sup>24</sup>Yūcuán na te tēe grupo fariseo ni cacahān de jíin yá:

Condēhé. ¿Najehē casáha tēe cáscuáha jíin ró súcuan? Chi áchí ley Moisés jeē ma cúu sáha yó ni iin jniñu quivī ndétátú. Achí de.

<sup>25</sup>Te ni cahān maá yá jíin de:

¿A tu ní cácahu cuiti rō tutu ndese ni sáha David, iin quivī ní cumanī jeē cáji de, te ni jíi de sōco jíin tēe cáhiin jíin de? <sup>26</sup>Te ni quivī de ini vehe Yāā Dios. Te Abiatar ni cuu sutū cujéhnu ga. Te ni yeji de pan iī jeē yosó ndijin nuū Yāā Dios. Te tú na ley jeē cáji ni iin tēe, chi máá-ni sutū cuu caji. Te suni ni jēhe de ni cayeji tēe cáhiin jíin de. Te tú na cuēchi ní iyo síquī de. Achí yá.

<sup>27</sup>Te suni ni cahān yā jíin de jíjnāhan de:

Tu ní jéconaā ñayuu jeē ndóho i nuū quivī ndétátú, chi ni jeconaā quivī un jéē ndétátú i. <sup>28</sup>Núu súcuan te ruhū, Yāā ní nduu tēe, máá rí cúu jeē ndácu jniñu síquī ndese sáha ñayuu quivī ndétátú, áchí yá.

### Jeē ní nduvāha tēe ni ichī ndaha

(Mt. 12.9-14; Lc. 6.6-11)

**3** Te ni quivī tucu Jesús ini vehe iī sinagoga. Te yūcuan íne iin tēe ni ichī iin ndaha de. <sup>2</sup>Te tēe grupo fariseo cájito yuhu de ya núu nasávāha ya tēe un quivī ndétátú, návāha nihin de cuēchi síquī yā. <sup>3</sup>Yūcuán na te ni cahān yā jíin tēe ni ichī ndaha ún:

Ndocuñi te condichi rō mēhñu yāha, áchí yá.

<sup>4</sup>Te ni cajnūhun yá de jíjnāhan de: ¿Ndese cáhán ley síquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñayuu je yajni cuu, chí sáha yó jéé cúu i? áchí yá.

Te máá de tú na vé ni cacahān de. <sup>5</sup>Te ni quitī ni yā ni jito ya nuū de jíjnāhan de, te ni cucufhyá ni yā jeē

níhni ni de. Te ni cahān yā jíin tée ni ichi ndaha:

Scáá ndaha ró.

Te ni scaá de, te ni nduvāha-ni ndaha de. <sup>6</sup>Yūcuán na te ni quendacoo tēe grupo fariseo, te ni casquijnáhan de jnūhun jíin tēe grupo Herodes siquī yā, ndese cahni de ya.

**Jeē ní quecoo cuehē  
ñayuu nuū yā yumar**

<sup>7</sup>Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquin i ya. <sup>8</sup>Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jēhnu ni sáha ya, te ni quecoo i nuū yā. <sup>9</sup>Te ni cahān yā jíin tēe cáscuáha jíin yá jeē na cóo tūhva iin barco quīvi ya, návāha ma chítú níhin ñayuu cuehē ún xiin ya. <sup>10</sup>Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca núu cuehyī, te chítú níhin i xiin ya jeē quehé i ya cácuni i. <sup>11</sup>Te ñayuu cáñuhun tachī ini, núu ni cajito nuū yā, te cájecuñī yití núu yā, te cácana cóhó:

Máá ní cúu Sēhe Yaā Dios, achí.

<sup>12</sup>Te ni ndacu níhin ya nuū tachí un jēē ma cáhán gā jeē cúu ya Sēhe Yaā Dios.

**Jeē ní nacāji ya uxī uū tēe apóstol**

(Mt. 10.1-4; Lc. 6.12-16)

<sup>13</sup>Yūcuán na te ni caa ya cuahān yā iin yucu. Te ni cana ya tāca tēe jeē cuní máá yá caca jíin yá, te ni

quecoo de nuū yā. <sup>14</sup>Te ni jeni ya uxī uū de jeē cuñī de jíin yá, te tají yá de quingoo de nacani de jnūhun. <sup>15</sup>Te ni sáha ya jeē cóndiso jniñu de nasávāha de ñayuu cuhú te quenehen de tachī ini ñayuu. <sup>16</sup>Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. <sup>17</sup>Te Jacobo jíin ñani de Juan, sēhe Zebedeo. Te ni nasnání yá ndindúu de Boanerges, jeē cuní cahān: Tēe yíhi fuerza nacani jnūhun, nájñuhun yíhi fuerza taja. <sup>18</sup>Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, <sup>19</sup>jíin Judas Iscariote, tēe jeē ní nastúu de ya.

**Jeē ní cacahān ñayuu jeē jejniñu ya  
fuerza Satanás**

(Mt. 12.22-32; Lc. 11.14-23; 12.10)

Yūcuán na te ni quīvi ya iin vehe jíin tēe cáscuáha jíin yá un. <sup>20</sup>Te ni ndutútú tucu cuehē ñayuu, te ni tuá ni cúu caji yā staā jíin de. <sup>21</sup>Te tāca jnáhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cácahān de jeē ní sana xinī yā.

<sup>22</sup>Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñuhun Satanás ini de, jeē cujēhnu nuū tachí. Te jíin fuerza un quenehen de tachí, achí de.

<sup>23</sup>Te ni cana ya de jíjnáhan de, te ni cahān yā iin jnūhun yátá jíin de: ¿Ndese cuu quenehen Satanás máá? <sup>24</sup>Chi núu iin nación sásiin máá te cuajnáhan máá, nación un má cúu ga coyūcu cáhnu. <sup>25</sup>Te núu ñayuu iin vehe sásiin máá te

cuajnáhan máá, ñayuu un má cúu ga coyūcu cáhnu. <sup>26</sup>Te suni súcuan Satanás jíin jnáhan tachī, chi núu sásíin máá te cuajnáhan máá, núu súcuan te ma cóo ga, chi sa suhva naa.

<sup>27</sup>Te ni ñin tēe ma cúu quīvi de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachī.

<sup>28</sup>Te jendaá cahán rī jíin ró jeē iyó modo coo jñuhun cáhnu ni nuū tāca cuéchi cásáha ñayuu, te suni nuū tāca jñuhun néé cácahān i. <sup>29</sup>Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i níí cáni, áchí yá.

<sup>30</sup>Súcuan ni cahān yā, chi ni cacahān i jeē quénehen ya tachī jíin fuerza Satanás.

### Náná yā jíin ñani yā

(Mt. 12.46-50; Lc. 8.19-21)

<sup>31</sup>Yūcuán na te ni quee naná yā jíin tāca ñani yā. Te íin ña nuū quéhe, te ni tají ña jñuhun cuahān nuū yā jeē cána ña ya. <sup>32</sup>Te ñayuu cáyūcu níí xiin ya, ni cacahān i jíin yá:

Náná ni jíin tāca ñani ni cáhiin nuū quéhe, te cácuni cahān jíin ní, áchí i.

<sup>33</sup>Te ni cahān maá yá:

¿Ndé ñin cúu náná rī jíin ñani rī? áchí yá.

<sup>34</sup>Yūcuán na te ni ndacoto ya nuū ñayuu cáyūcú xiin ya ún, te ni cahān yā:

Suni náná rī jíin ñani rī cácuu tāca ñayuu yáha. <sup>35</sup>Chi tāca ñayuu

casquícu jniñu cúní Yaā Dios, suu cácuu ñani rī, cuāha ri, náná rī, áchí yá.

### Jñuhun yátá síquī tēe jéte trigo

(Mt. 13.1-9; Lc. 8.4-8)

**4** Te yumar ni quejéé tucu Jesús steén yā jñuhun. Te ni cutútú cuéhē ndasí ñáyuu nuū yā, te jeē yúcuan ní quīvi ya ni cucōo ya ini ñin barco nuū mar. Te tāca ñayuu un cáyūcú i yumar. <sup>2</sup>Te jíin jñuhun yátá ni steén yā cuéhē jñuhun nuū i, te súcuan ni cahān yā:

<sup>3</sup>Cuni nahín jíjnáhan ró: ñin tēe cate trigo, ni quenda de jeē cate de.

<sup>4</sup>Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tī. <sup>5</sup>Te jecu gā trigo ni jité nuū ñuhun yuū, nuū tú cuéhē ñuhun. Te yachī-ni ni cane, chi tu cóquin ñuhun. <sup>6</sup>Te nuū ní cane niāndii, te ni ichī-ni, te ni casun, chi tu ní níhín nuū quihín yoho. <sup>7</sup>Te jecu gā trigo ni jité nuū náne íñu. Te ni jehnu íñu ún, te ni jesi nuū, te tu ní jéhe nunī.

<sup>8</sup>Te jecu ni jité nuū ñuhun váha. Te ni cane, te ni jehnu, te ni jēhe cuéhē nunī. Sava ni jēhe ocō uxí jeē íin ñin nunī, te sava ga ni jēhe uní xico, te sava ga ni jēhe ciento. Achí yá.

<sup>9</sup>Yūcuán na te ni cahān yā jíin de: Tāca róhó jéé jíni sōho, na chúsóhó ró. Achí yá.

### Najehē cahán yā máni jñuhun yátá

(Mt. 13.10-17; Lc. 8.9-10)

<sup>10</sup>Yūcuán na te ni quendōo máá na yā, jíin ndihúxí uū tēe cáscuáha jíin yá, jíin jecu gā ñayuu cáhiin jíin de. Te ni cacajñuhún de ya na vé cuní cahān jñuhun yátá un. <sup>11</sup>Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhiin sñin siquī, chi máni jín jnūhun yátá cáhán rī tāca jnūhun jín i. <sup>12</sup>Súcuan cáhán rī návāha vēsú cájito i, te quendōo i nájñūhun jeē tú na vé ni cájito i. Te vēsú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, áchí yá.

**Jeē ní castūhun cájī yá jnūhun yátá tée jéte trigo**

(Mt. 13.18-23; Lc. 8.11-15)

<sup>13</sup>Te ni cahān gā yā jín de jíjnāhan de:

Núu tu cájecūhun ni rō jnūhun yátá yáha, ¿te ndese jecūhun ni rō tāca gá jnūhun yátá núu súcuan? <sup>14</sup>Tēe jéte trigo cúu tēe scuíté núu jnūhun Yaā Dios. <sup>15</sup>Te trigo jeē ni jítē yuhíchi cúu nájñūhun ánuá sava ñayuu. Chi cájini nahín i jnūhun ya, te ná ni cajini i, te quíji-ni Satanás te quénde-ni jnūhun ini anuá i. <sup>16</sup>Te trigo jeē ni jítē nuū ñūhun yuū, chi cúu nájñūhun ánuá sava ñayuu cájini nahín jnūhun, te yachī-ni cájetáhú i te cácusī ni i jín. <sup>17</sup>Te tu cúcutú jnūhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeē ñayuu i siquī jnūhun ún, te quéjéé nácani yátá ni i. <sup>18</sup>Te jeē ni jítē nuū náne iñu cúu nájñūhun jecu gā ñayuu. Chi vēsú ni cajini sōho i, <sup>19</sup>te cándihvī ni i siquī jeē iyó ini ñayivī yáha. Te cácuni i cucúcá i, te stáhú un i jeē cutóo ni i siquī tācá ndajniñu. Te

ndihi jeē yáha cácuñéñu i jín, te jési nuū jnūhun ya, te tu íje i jín jnūhun ya. <sup>20</sup>Te trigo jeē ni jítē nuū ñūhun váha cúu nájñūhun ñayuu cájini nahín jnūhun, te cájetáhú i, te cáhije i jín jnūhun ya. Te sava i cúu nájñūhun nunī jeē jéhe ocō uxī jeē ñin ñin, te sava i jéhe unī xico, te sava ga i jéhe ciento. Achí yá.

**Jnūhun yátá síquī lámpara**

(Lc. 8.16-18)

<sup>21</sup>Suni ni cahān yā jín de:

Núu nástñin ñayuu ñin lámpara, ¿a chúne i chíji ñin cajón chí chíji jito? Tuú, chí jéni i nuū súcun návāha cundijin. <sup>22</sup>Te suni súcuan, tu íyó ni ñin jnūhun sáhi jéé ma cúni ñayuu, chí ndihi tāca jnūhun natūu ndijin te cuni ñayuu. <sup>23</sup>Tāca róhó jéé jini sōho, na chúsohó ró, áchí yá.

<sup>24</sup>Te suni ni cahān yā jín i:

Cuni sōho váha ró. Chi cūhva jeē chúsohó ró jnūhun Yaā Dios, suni cūhva un cuáha ya nuū rō, te víhyá gā cuáha ya nuū maá ró jeé chúsohó váha ró. <sup>25</sup>Chi ñayuu je jécūhun ni, stéén gā yā nuū i. Te ñayuu tu cándíje, máá jecu jeé jini i ún, sa suhva naa. Achí yá.

**Jnūhun yátá síquī trigo jeé jéñnu**

<sup>26</sup>Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájñūhun trigo jeé ní jete ñin tēe. <sup>27</sup>Yūcuán na te quíxi de te ndóna de, te súcuan jica quivī cuahān. Te trigo un cáne te jéñnu. Te máá de tu jini de ndese cúu jeé jéñnu. <sup>28</sup>Chi máá ñūhun sáha jeé jéñnu trigo, xihna gā yucū, sáá te cáne yoco, yūcuán na te íje máá nuni. <sup>29</sup>Te núu ni cuan trigo



un, te quéjéé ñáyuu cájehnde i, chi je ni jinū quivī tahndé. Achí yá.

**Jnūhun yátá síquī ndiquin mostaza**

(Mt. 13.31-32; Lc. 13.18-19)

<sup>30</sup>Te suni ni cahān yā:

Na cáhán rī iin jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. <sup>31</sup>Ndúcuehē i nájñuhun jéhnū iin ndiquin mostaza jeē jéquin i nuū ñúhun. Te yūcuan cúu iin ndiquin lúli gá vēsú tācá ndiquin jeē iyó. <sup>32</sup>Te ná ni jequin i, te cáne te jéhnū ga vēsú tāca gá yucū, te cúnáhnū ndaha. Te tācá saa chi sáha ti tacā tī nuū cuándahū xinī ún. Achí yá.

**Jeē máni jnūhun yátá cáhán yā jíin i**

(Mt. 13.34-35)

<sup>33</sup>Te cuehē jnūhun yátá súcuan ni cahān yā jíin ñáyuu, núu nasaa cánda i jecūhun ni i. <sup>34</sup>Te tāca jéē ni stéén yā, máni máá jnūhun yátá ní cahān yā jíin i. Te nuū tēe cáscuáha jíin yá chi ni nacastūhun cáji yá jnūhun ún.

**Jeē ní jecuiñī tachī níhin jíin mar ni sáha ya**

(Mt. 8.23-27; Lc. 8.22-25)

<sup>35</sup>Te jeē cuácuaa quivī ún, te ni cahān yā jíin tēe cáscuáha jíin yá:

Na yáha yó quíhīn yō inga lado mar, achí yá.

<sup>36</sup>Te ni casquéndō de ñayuu cuehē ún, te ni quivico de ini barco nuū je íne Jesús, cuango de jíin yá. Te suni cuango jecu gā barco jíin de jíināhan de. <sup>37</sup>Te ni jequihī iin tachī níhin, te ni stónnda ndute mar, te ni quivī ini barco. Te je yajni chitū ndute ini barco. <sup>38</sup>Te

Jesús cátu yá yatā de ini barco, quixí yā te yíhi iin sahma cástíhi xinī yā. Te ni castónnda de ya, te ni cacahān de:

Maestro, ¿á tu sáha ní cuenta jeē quee yó chíji ndute te cuu yō? achí de.

<sup>39</sup>Te ni ndocuiñī yā, te ni cahān yā nuū tachí níhin un jíin núu mar:

Jecuiñī te nayúu-ni coo ró, áchí yá.

Te ni jecuiñī tachī, te ni cuu nayúu íi-ni. <sup>40</sup>Te ni cahān yā jíin de jíināhan de:

¿Naun cáyūhú ndasí ró? ¿Naun tu cácandíje ró jéē cācu ró sáha rí?

<sup>41</sup>Te yōhyo ni cayūhú de, te ni cacahān de jíin jnāhan de:

¿Ndé iin ga cúu tēe yáha jéē nde tachī níhin jíin mar cájetáhu jéē cahān de? áchí de.

**Tēe Gadara jeē ndóho tachī**

(Mt. 8.28-34; Lc. 8.26-39)

**5** Te ni jinū Jesús jíin de jíināhan de inga lado mar, región Gadara. <sup>2</sup>Te ná ni quenda ya ini barco un, te iin tēe ñúhun tachī ini, ni quenda de nde nuū yíndūji ndīyi, te ni quee de nuū yā. <sup>3</sup>Tēe un ndéé de nuū yíndūji ndīyi. Te tu jéjñū jeē jíhni ñayuu de, ni jíin cadena. <sup>4</sup>Chi cuehē jínu ni conuhni jehē de ndaha de jíin cadena. Te tāca jínu jéhnde de, te sácuéchi de. Te tú ni iin cúndeyí jíin de. <sup>5</sup>Te nduú ñuú jíca de yucu jíin núu yíndūji ndīyi, te cána cóhó de, te stújí de máá de jíin yúu. <sup>6</sup>Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. <sup>7</sup>Te ni cana cóhó de:

¿Naun vēji ní núū ná, Jesús Sēhe Yaā Dios, Yaā cujéhnū téyí? Cáhán ndahú ná jíin ní, jíni nahín Yaā Dios, ma stóho ní sáña, áchí de.

<sup>8</sup>Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

<sup>9</sup>Te ni cajñūhun yá de:

¿Na vé naní rō?

Te ni cahān de:

Legión naní ná, chi cuehē tachī ñūhun ini ná, áchí de.

<sup>10</sup>Te ni cahān ndahú ndasí de jíin yá jeē ma tájí yá tachī quendacoo región ún. <sup>11</sup>Te yajni yucu yúcuan cáhiin cuehē quīnī cájitu tí.

<sup>12</sup>Te tachī jeē ñūhun ini tēe un ní cacahān ndahú jíin yá:

Núu tají ní sāñá, te cuāha ní jñūhun quīvīcoo ná ini quīnī yūcuán, áchí.

<sup>13</sup>Te Jesús ni jēhe ya jñūhun.

Te ni quendacoo tachī ún ini tēe ún, te ni quīvīcoo ini quīnī, te íyó nájnūhun uū mil tí. Te quīnī un ní cajinu tí ni ñingoo tí ñin yucáva, ni quīvīcoo tí nuū mar. Te ni ndaquíhi tí ndute, ni cajihí tí.

<sup>14</sup>Te tēe cándito tí, ni cajinu de cuango de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuango ñáyuu un cuácondēhé i na vé ni cuu. <sup>15</sup>Te ni jinūcoo i nuū íne Jesús, te ni cajito i nuū tée ni ñūhun cuehē tachī ini. Te néne de, te ñūhun de sahma, te je ni nducájí xíní de. Te ni cayūhú ñáyuu ún. <sup>16</sup>Te tēe ní cajito, ni canacani de jñūhun nuū ñáyuu, ndese ni nduvāha tēe ni ñūhun tachī ini, jíin ndese ni candoho quīnī

ún. <sup>17</sup>Yūcuán na te ni caquejéé i cacahān ndahú i jíin yá jeē na cújiyo ya región yūcuan quíhīn yā.

<sup>18</sup>Te ni ndīvi ya ini barco. Te tēe ni ñūhun tachī ini un ní cahān ndahú de jíin yá jeē na cuāha ya jñūhun quíhīn de jíin yá. <sup>19</sup>Te Jesús tu ní jēhe ya jñūhun, chi ni cahān yā jíin de:

Cuánuhun vehe ró núū jnáhan ró, te nacani ró jñūhun nuū i ndese yōhyo jéhnū jniñū ni sáha máá Jítóho rō jíin ró, te ndese ni cundáhú ni yā rohó, áchí yá.

<sup>20</sup>Te ni quenda de cuahān de, te ni quejéé de nácani de jñūhun tācá ñuu Decápolis ndese yōhyo jéhnū jniñū ni sáha Jesús jíin de. Te ndīvii ñáyuu un ní canaa ni i cájini nahín i.

### **Jñūhun sēhe síhí Jairo jíin ñahan ní quehé yusáhma ya**

(Mt. 9.18-26; Lc. 8.40-56)

<sup>21</sup>Te ni nayāha tucu Jesús cuanuhun yā inga lado mar jíin barco. Te ni quecoo cuehē ñáyuu nuū yā, nuū íne ya yumar. <sup>22</sup>Te ni quee ñin tēe cújéhnū ini vehe íi sinagoga, naní de Jairo. Te ná ni jito de nuū yā, te ni jecuiñī yití de nuū jehé yā. <sup>23</sup>Te ni cahān ndahú ndasí de jíin yá:

Sēhe síhí ná je yajni cuu i. Na quíhín yō vehe ná te soó ní ndaha ní síquī i návāha na ndúvāha i te cotecu i, áchí de.

<sup>24</sup>Yūcuán na te cuahān yā jíin de. Te cuehē ñáyuu cándiquīn i ya, te ni chitú níhin i xiin ya cuango i. <sup>25</sup>Te mēhñū ñáyuu un cuáhān ñin ñahan cúhú, jeē ní cuu uxī uū cuiyā ndóho ña cuehyī niñī. <sup>26</sup>Te

yōhyo ni ndoho ña, chi ni jexin ña tāca jéē névāha ña jíin cuehē tēe tájná, te tu ní jéjníñu jeē nduvāha ña, chi sa suhva víhyá gā sáha. <sup>27</sup>Te ñahan yáha ná ni nihin ña jñuhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. <sup>28</sup>Chi ni jeni ni ña: Vēsú maá sahma ya na níhín rī quehé rí, te nduvāha ri, jéni ni ña. <sup>29</sup>Te ni jecuiñī-ni niñī ña, te ni jini ña jeē ní nduvāha ña cuehyī ún. <sup>30</sup>Te Jesús ni jini yā jeē ní nduvāha ñin ñayuu jíin fuerza yā. Te ni ndió cóto ya nuū ñáyuu cuehē, te ni cahān yā:

¿Nde ñin ni quehé sahma ri? Achí yá.

<sup>31</sup>Te tēe cáscuáha jíin yá, ni cacahān de:

Jíto ní jéē ñáyuu cuehē yāha ní chitú níhín i xiin ní te cáquīhi i níhín níf cáni ichi, te cájnūhun ní ndé ñin ni quehé sahma ní.

<sup>32</sup>Te máá yá jíto ya cháha chucuan, cúní yā jeē na cáchi ñayuu ni sáha. <sup>33</sup>Te ñahan un yúhú ña te quísi i ña, te je jíin ña jeē ní nduvāha ña. Te ni quee ña, te ni jecuiñī yití ña nuū yā, te ni cachi ña ndihí ndese ni cuu jíin ña. <sup>34</sup>Te ni cahān yā jíin ña:

Séhē, ni candíje ró jéē cuu nasāvāha ri rohó, te jeē yúcuan ní nduvāha ró. Cuáhán te na ndúsīi ní rō, chi je ni nduvāha ró cuehyī ní ndoho ró, achí yá.

<sup>35</sup>Te níiní cáhán gā yā súcuan, te ni quecoo ñayuu cáyúcú vehe tēe cújéhnú ini vehe ñi sinagoga, te ni cacahān i jíin de:

Je ni jihí sēhe síhí ní. Te ma sajñéñu ga ní Maestro, achí i.

<sup>36</sup>Te Jesús tu ní sáha ya cuenta jeē súcuan cácahān i, te ni cahān yā jíin tēe cújéhnú ini vehe ñi sinagoga:

Ma yūhu ró, chi candíje ró jéē nastécu rī i, achí yá.

<sup>37</sup>Te tu ní jéhe ga yā jñuhun condiquīn ñayuu yā, chi máá-ni Pedro jíin Jacobo, jíin Juan ñani Jacobo. <sup>38</sup>Te ni jinū yā vehe tēe cújéhnú ini vehe ñi sinagoga, te ni jito ya ñayuu, cácuvaā i, te cándahyū i, te cácana cóhó i. <sup>39</sup>Te ni quívi ya, te ni cahān yā:

¿Najehē yōhyo cásvaā rō te cándahyū rō? Sūchi síhí yáha, tu ní jíhí i, chi quíxí-ni i, achí yá.

<sup>40</sup>Te ni cajecū catá i jeē ni cáhān yā. Te ni quenehen ndihí ya i cuahān i nuū quéhe. Te ni cana ya máá-ni tátá jíin náná sūchi síhí un, jíin tēe cáhiin jíin yá, te ni quívi ya jíin de nuū catú sūchi síhí ní jihí ún. <sup>41</sup>Te ni jñi ya ndaha i, te ni cahān yā jíin i:

Talita cumi, achí yá. Te jñuhun un cúní cahān: Síhī, cáhán rī jíin ró, ndocuñī, achí yá.

<sup>42</sup>Te ni ndocuñī-ni sūchi síhí un, te ni nacaca i, chi je íyó i uxí uū cuiyā. Te yōhyo ni canaa ni ñayuu cájito i. <sup>43</sup>Te ni ndacu níhín ya jñiñu nuū i jíjnāhan i jeē ma cáchi cuítí i nuū ni ñin. Te ni cahān yā jeē na cuáha ña jeē cáji sūchi síhí.

### Jeē cuánuhun yā ñuu Nazaret

(Mt. 13.53-58; Lc. 4.16-30)

**6** Te ni quenda Jesús yūcuán, te cuanuhun yā ñuu yā. Te tēe cáscuáha jíin yá cuangoo de jíin yá. <sup>2</sup>Te máá quívi ndétātu ní steen yā jñuhun ini vehe ñi sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnúhun yáha? ¿Te ndese cúu jeē cahán de jnúhun ndíchí yáha jíin jēe sáha de jniñu jéhu yáha? <sup>3</sup>Chi tēe yáha cúu carpintero, te sēhe María cúu de, te ñani Jacobo jíin José jíin Judas jíin Simón cúu de. Te suni cáyūcu cuáha de jíin yó yáha. Achí i.

Te súcuan ni cacujéē ni i nuū Jesús. <sup>4</sup>Te ni cahān yā jíin i:

Tāca tēe nácani jnúhun Yaā Dios, íyó yíñúhún ñayuu jíin de, chi máni ñayuu ñuu maá de, jíin jnáhan de, jíin ñayuu vehe de cúu jeē tu íyó yíñúhún jíin de. Achí yá.

<sup>5</sup>Te tu ní cúu sáha ya cuehē jniñu jéhu yūcuán. Chi jecu-ni ñayuu cácuñu ni soó yá ndaha ya siquī i, te ni nasávāha ya i. <sup>6</sup>Te náā ni yā jíto ya jeē tu cácanđíje ñayuu jijnáhan i. Yūcuán na te ni jica cuu ya tācá ñuu yajni, ni steén yā jnúhun.

**Jeē ní tají yá ndihúxí uū de cuanacani de jnúhun**

(Mt. 10.5-15; Lc. 9.1-6)

<sup>7</sup>Te ni cana ya ndihúxí uū tēe cáscuáha jíin yá, te ni tají yá ndihuū ndihuū de quingoo de. Te ni sáha ya jeē cóndiso jniñu de quenehen de tachí ini ñayuu. <sup>8</sup>Te ni ndacu ya jeē tú na vé condiso de jeē cuajniñu de ichi, ni ñunu, ni staa, ni xuhún. Chi máá vara-ni condahá de. <sup>9</sup>Te quíhi de ndijēn, te ma quihín de jíin úu sahma, áchí yá. <sup>10</sup>Te suni ni cahān yā jíin de:

Na-ni vehe núu ni quivicoo ró, te yūcuán coyūcu ró ndé quenda tucu ró quíhin rō inga ñuu. <sup>11</sup>Te núu iin ñuu tu cájetáhú i róhó, ni tu cúní

i cuni nahín i jnúhun cahān rō, na quéndacoo ró yúcuán, te scóyo ró tícachā jehē rō, te súcuan stéén rō jeē iyó cuēchi i jeē tu ní cájetáhú i. Jendaá cahán ri jíin ró jeē quiví coo juicio te xeēn gā coo castigo siquī ñuu casáha súcuan vēsú siquī ñuu Sodoma jíin ñuu Gomorra nuū ní casáha ndasí ñayuu cuēchi.

<sup>12</sup>Te ni quendacoo de cuahān de, te ni canacani de jnúhun jeē na nácani ni ñayuu jeē stóo i cuēchi i. <sup>13</sup>Te suni ni caquenehen de cuehē tachí ini ñayuu. Te ni cachihí de aceite cuehē ñayuu cácuñu, te ni canduvāha i.

**Jeē ni jíhi Juan tēe scuándute**

(Mt. 14.1-12; Lc. 9.7-9)

<sup>14</sup>Te rey Herodes ni jini jnúhun de jnúhun Jesús, chi ni jitē núu jnúhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhu. Achí de.

<sup>15</sup>Te sava ga ñayuu ni cacahān i: Tēe un cúu Elías jeē ní nacani jnúhun jenahán.

Te sava ga i ni cacahān:

Tuú chí iin tēe nácani jnúhun Yaā Dios cúu de, nájnúhun tēe ni canacani jnúhun ya nde jenahán, áchí i.

<sup>16</sup>Te ná ni jini Herodes, te ni cahān de:

Tuú chí yūcuán cúu Juan jeē ní ndacu ri jniñu ni tahndé xiní, te ni natecu de núu súcuan, áchí de.

<sup>17</sup>Chi máá Herodes ni ndacu de jniñu jeē na quiví Juan vecāa, jíin jēe na cónuhni de jíin cadena. Súcuan ni sáha de jeē siquí

Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. <sup>18</sup>Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

<sup>19</sup>Te jeē yúcuān Herodías ni jito uhū ña Juan, te cúní ña jeē na cúu de, te tu ní níhín ña modo. <sup>20</sup>Chi Herodes yúhú de cahni de Juan, chi jíni de jeē tēe ndaā tēe ndoo cúu Juan. Te jeē yúcuān ní jesi de jeē nducú ña jeē cúu Juan. Te nújnahān ni de jíni nahín de jnūhun cáhān Juan, vēsú tu jécūhun vāha ni de.

<sup>21</sup>Te ni quee ñi quivī jeē ní cundeyí Herodías. Chi ni sáha Herodes ñi vico quivī ní cacu de, te ni jēhe de jeē ní cacuxíni tēe cándiso jniñu nuū de, jíni tēe cácuu capitán, jíni tēe cácuájēnu región Galilea. <sup>22</sup>Te ni quivī sēhe síhí máá Herodías, ni jita jéhe i nuū chitú un. Te ni cacusiñi ni rey Herodes jíni tēe cácuaxíni jíni de. Te ni cahān de jíni súchi síhí un:

Cacān na vé cuní rō, te cuāha ri nuū rō, achí de.

<sup>23</sup>Te ni cahān teyí de jeē cuāha de núu na vé cuní i cacān i, vēsú nde sava región jeē yíhi ndaha de. <sup>24</sup>Te ni quenda i, ni jecajñuhún i náná i: ¿Na vé cacān na núu de? áhí i.

Te ni cahān ña:

Xini Juan tēe scuándute cacān rō nuū de, achí ña.

<sup>25</sup>Yūcuān na te ni ndīvi-ni i nuū rey, te ni cahān i:

Cúní na jéē vijna ñuhún-ni cuāha ní xini Juan tēe scuándute, cone nuū ñi cohō, achí i jíni de.

<sup>26</sup>Yūcuān na te ni cucuíhyá ndasí ni rey un jeē ní cundeyí Herodías jeē cúu Juan. Te siquī jeē ni

jéjñuhun téyí de, jíni jéē ní cajini sōho tēe cáyeji staā jíni de, jeē yúcuān tu ní cúní de sásáhān de jeē ni jíni i. <sup>27</sup>Te ni tají-ni de ñi soldado jeē quiquihin de xini Juan. <sup>28</sup>Te ni jehēn soldado un vecāa, te ni jehnde de xini Juan. Te ni quee de jíni xini Juan, íne nuū ñi cohō. Te ni jēhe de nuū súchi síhí un, te máá i ni jēhe i nuū naná i.

<sup>29</sup>Te tēe cáscuáha jíni Juan ni canihin de jnūhun, te ni jengoo de, ni candonehen de yiqui cúu Juan, te ni cachindūji de.

### Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

<sup>30</sup>Yūcuān na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíni jnūhun ni castéén de. <sup>31</sup>Te ni cahān yā jíni de:

Na quingoo yó ñi lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíni de. <sup>32</sup>Yūcuān na te ni quivī ya ñi barco jíni táca tēe apóstol un, te cuangoo síni ya jíni de ñi lugar nuū tú ñayuu. <sup>33</sup>Te cuehē ñayuu ni cajito i jeē cuahān yā jíni de, te ni canacuni i jeē máá yá cúu. Te nde tācá ñuu ni quendacoo i, te yachí cuangoo i, te xihna gā i ni jinūcoo vēsú máá yá. <sup>34</sup>Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájnūhun lanchi jeē tú jito ho tī. Te ni steén yā cuehē jnūhun nuū i. <sup>35</sup>Te nuū ní ini, te tēe cáscuáha jíni yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. <sup>36</sup>Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, áchí de.

<sup>37</sup>Te ni cahān Jesús jíin de:

Cuāha máá ró jeē caji i, áchí yá.

Te ni cacahān de:

¿Te ndese cuu? Chi ni ma cúu vesú núu quicuaan ná ndé uū ciento denario staā caji ñayuu, achí de.

<sup>38</sup>Te ni cahān yā jíin de:

¿Nasaa staā cánevāha ró?

Cuacondēhe, áchí yá.

Te nuū ní cajini de, te ni cacahān de:

Uhūn-ni staā jíin úū chācá íyó, áchí de.

<sup>39</sup>Yūcuán na te ni cahān yā jíin ñáyuu jeē na cúcōo sīn i cuenta grupo nuū íte. <sup>40</sup>Te ni cacucōo sīn ciento ciento i, jíin cincuenta cincuenta i. <sup>41</sup>Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahu cuéchí yá staā ún, te ni jēhe ya nuū tée cáscuáha jíin yá, te máá de ni casaja de nuū ñáyuu cuehē ún. Te suni ni jēhe ya ndindúú chācá, ni casaja de nuū i. <sup>42</sup>Te ndivii i ni cayejí, te ni candutú chjíi i. <sup>43</sup>Yūcuán na te ni canastútú de pedazo staā jíin cháca jéé ní quendōo, te ni chitú úxí uū jica. <sup>44</sup>Te tēe ni cayejí, chi uhūn mil de cúu.

### Jeē ní jica jéhé yá nuū mar

(Mt. 14.22-27; Jn. 6.16-21)

<sup>45</sup>Yūcuán na te ni cahān-ni Jesús jíin tée cáscuáha jíin yá jeē na quívicoo de barco, te cosnūú de

yāha de inga lado mar ñuu Betsaida. Te máá yá chi natají yá ñayuu quinhun i, te sáá te suni quihin yá. <sup>46</sup>Te nuū ní cuu ni natají yá i, te ni caa ya yucu cuacacān tahu yá. <sup>47</sup>Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñúhun íchi. <sup>48</sup>Te ni jito ya jeē yóhoyo jnündóho cáscaca de barco, chi ñihin vēji tachí ichi núú de. Te jeē yínee gā ni quee ya nuū de, jica jéhé yá nuū mar. Te yāha ya nuū de quihin yā nuú. <sup>49</sup>Te ni cajito de jeē jica ya nuū mar, te ni cajeni ni de jeē jihná cúu, te ni cacana cóhó de. <sup>50</sup>Chi ndihí de ni cajito nuū yá, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, áchí yá.

<sup>51</sup>Te ni quívi ya ini barco un, te ni jecuiñi-ni tachí. Te yóhoyo ni canaa ni de cájito de. <sup>52</sup>Chi cándāa nées gá jeē níjnūní de, chi ni jíin jniñu jéhnú jeē ní nducuehē staā, tu ní cájecūhun ni de jeē máá yá cúu Yaa ní tají Yaa Dios.

### Jeē ní nasávāha ya ñayuu cácuñu región Genesaret

(Mt. 14.34-36)

<sup>53</sup>Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. <sup>54</sup>Te nuū ní quenda ya jíin de ini barco, te ñayuu yúcuan ni canacuni-ni i ya. <sup>55</sup>Te yachí ni jengoo i tācá ndañúú yūcuán, te ni caquindeca i ñayuu cácuñu, cáyosó i nuū camilla, vējicoo ñayuu nuū ní jito i íne ya. <sup>56</sup>Te ndé-ni cúu-ni núu ní quívi ya, núu ñuu lulí, chí

ñuu cáhnu, chí rancho, te cájequin i ñayuu cácuñu yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñayuu jeē ní caquehé sahma ya, ni canduvāha-ni i.

### Siquī ndese cújnehén ñayuu

(Mt. 15.1-20)

**7** Yūcuán na te tē grupo fariseo jíin jecu tē cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. <sup>2</sup>Te tē un ní cajito de jeē sava tē cáscuáha jíin Jesús, ni cayejí jnehén de staā, chí tu ní cáscuicu de costumbre jeē nāndahá de nuū Yaā Dios. Te ni cacahān siquī de. <sup>3</sup>Chí tē fariseo jíin ndíhi ñayuu hebreo, névāha i costumbre jenahán jeē ma cáji i staā núu tu nandahá vāha i xihna gā. <sup>4</sup>Te núu ni ndecoo i jeē ni jéngoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquicu i, nájñuhun jeē ndúndoo taza, tindhō, cohō cáa, jíin jíto. <sup>5</sup>Te tē fariseo jíin tē cástéén tutu ley Yaā Dios, ni cacajñuhún de ya:

Tē cáscuáha jíin ró, ¿naun tu cáscuicu de costumbre ñayuu jenahán? Chí sa cáyeji jnehén de staā, achí de.

<sup>6</sup>Te ni cahān yā jíin de:

Ndaā ni nacani Isaiás jñuhun siquī rō jijnáhan ró jeē tē stáhú-ni cácuu ró. Chí súcuān ni tee de jñuhun ni cahān Yaā Dios nde jenahán:

Ñayuu yáha chí máá yuhu-ni i cájetáhú i ruhū,  
te nasūu ndé jíin ini jíin ánuá i.

<sup>7</sup>Te cáchiñuhún sáa-ni i ruhū,

chí jñuhun cástéén i cúu jniñu ní candacu tēe,

te nasūu jeē ní ndacu máá rí cúu.

Achí Yaā Dios. Achí Isaiás. <sup>8</sup>Súcuān cácuu ró, chí ni casiáá rō jniñu ní ndacu Yaā Dios nuū rō, te cáscuicu ró costumbre jeē ní cajequin ñayuu, jeē ndúndoo tindhō jíin taza. Te cuéhē gā costumbre súcuān cáscuicu ró, achí yá.

<sup>9</sup>Te suni ni cahān yā:

Cásiáá rō jniñu ní ndacu Yaā Dios, návāha squicu ró costumbre ni cajequin máá ró. <sup>10</sup>Chí Moisés ni cahān de: Coó yíñuhún ró jíin tátá rō jíin náná rō. Te núu ndé ññ cahān siquī tátá chí síquī naná, na cúu nahín. Achí Moisés. <sup>11</sup>Te máá ró chí cácahān rō jeē cuu cahān ññ tē jíin tátá de náná de: Ma cúu chindéé ññhán ná níhín cuáha na jeē cáji ni jeē cúhun ní, chí ndíhi jeē névāha ná, chí Corbán cúu, achí ró. (Te jñuhun Corbán cuní cahān jeē ní sócō nuū Yaā Dios.) <sup>12</sup>Te cácahān rō jeē núu súcuān cahān ññ tē, te tuá cánúu chindéé ññhán de tátá de náná de. <sup>13</sup>Te súcuān cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuéhē gā jniñu súcuān cásaaha ró, achí yá.

<sup>14</sup>Te ni cana tucu ya ñayuu cuéhē ún, te ni cahān yā jíin i:

Cuni sōho vāha ró jijnáhan ró, te chuhun ni rō: <sup>15</sup>Tāca jeē iyó, te núu ni quívi yuhu ñayuu te tu cújnehén i sáha. Chí jeē quēnda ini anuá ñayuu, yūcuān cúu jeē cújnehén i sáha. <sup>16</sup>Tāca róhó jeē jíni sōho, na chúsóhó ró, achí yá.

<sup>17</sup>Te ni stóo ya ñayuu cuéhē ún, te ni quívi ya ini vehe. Te tēe

cáscuáha ún, ni cacajñuhún de ya siquī jñuhun yátá yáha jéē ni cahān yā. <sup>18</sup>Te ni cahān yā jíin de:

¿A máá ró suni ná tu jecūhun ni rō, chí naún? ¿A tu cájini rō jeē tāca jéē quívi ini ñayuu, ma cúu cujñéhén i sáha? <sup>19</sup>Chi tu quívi ini anuá i, chi chíji i quívi, te quénda-ni cuahān, achí yá.

Súcuan ni steén yā jeē tāca jéē yéji ñayuu, tu cújñéhén ánuá i sáha. <sup>20</sup>Te ni cahān gā yā:

Jeē quénda ini anuá ñayuu, yūcuan cúu jeē cujñéhén i sáha. <sup>21</sup>Chi nde ini anuá ñayuu quénda jeē jéni néé ni, jeē casíquī ndéē jnáhan, jeē jíca jnéni, jeē jéhni ndīyi, <sup>22</sup>jeē sacuíhná, jeē ndíyo ni ndajníñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahán yāa síquī jnáhan, jeē sandúxí máá, jeē canéé xíní. <sup>23</sup>Tācá jniñu néé yáha, máni ini anuá ñayuu quénda, te cújñéhén i sáha, achí yá.

### **Ñahan inga nación jeē ní candíje níhin**

(Mt. 15.21-28)

<sup>24</sup>Te ni quenda ya yūcuan cuáhān yā región Tiro jíin Sidón. Te ni quívi ya iin vehe, te cúní yā jeē tú ni iin ñayuu cuni jeē íne ya yūcuán. Te vésú súcuan, te tu ní cúu cone sáhi yá. <sup>25</sup>Te iin ñahan íyó séhe síhí ña jeē ñuhun tachí ini i, ni nihín-ni ña jñuhun jeē íne ya. Te ni quee ña, te ni jecuñī yití ña nuū jehé yā. <sup>26</sup>Te ñahan ñuu jíca cúu ña, chi nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini séhe síhí ña. <sup>27</sup>Te ni cahān Jesús jíin ña:

Nasūu núu máá ní vēji ná, chi máni nuū ñáyuu cácuu séhe Israel. Chi tu íyó váha jeē quénde yō staa séhe te cuáha yó núu ina, achí yá.

<sup>28</sup>Te ni cahān ña:

Jendaá cahán ni Tátā, te chindéē ñáhán ní sáña vésú cúu ná nájñuhun ina. Chi suni máá tí cáhiin tí chíji mesa, cánihin tí staa cuechí jéē cóyo yuhu sūchi lúli cáyeji tí, achí ña.

<sup>29</sup>Yūcuán na te ni cahān yā jíin ña:

Váha ni cahān ní. Cuáhán ní núu súcuan, chí je ni quenda tachí ún ini séhe síhí ní, achí yá.

<sup>30</sup>Te ni najinū ña vehe ña, te ni jito ña jeē catú séhe síhí ña nuū jito, te je ni quenda tachí ún ini i.

### **Jeē ní nasávāha ya iin tēe sóhó cástété**

<sup>31</sup>Te ni quenda tucu ya región Tiro, ni yáha ya Sidón jíin táca ñuu Decápolis, te ni jinū yā mar Galilea. <sup>32</sup>Te ni caquindeca i iin tēe sóhó cástété nuū yā, te ni cacahān ndahú i jíin yá jeē na sóo yá ndaha ya siquī de. <sup>33</sup>Te ni quenehen síin ya de nuū ñáyuu cuehē ún, te ni chune ya xini ndáha ya sōho de, te ni tesíhi yá, te ni quehé yá yaá de. <sup>34</sup>Te ni ndacoto ya ichi ándiví, te ni jitū ni yā, te ni cahān yā:

Efata, achí yá, jeē cuní cahān: Nanune.

<sup>35</sup>Te ni nanune-ni sōho de, te ni nduvāha yáa de, te ni nacañā vāha de. <sup>36</sup>Te ni ndacu ya jniñu nuū ñáyuu un jéē ma cáchi i nuū ní iin. Te vésú ni cahān níhin ya jíin i, te víhyá gā ni cajete i jñuhun. <sup>37</sup>Te yōhyo ni canaa ni i cájito i, te ni cacahān i:



Vāha sáha ya tācá jniñu, chi nde tēe cásóhó, cánacuni sōho de, te tēe cándāa ñhín, cánacahān vāha de sáha ya, achí i.

**Jeē ni scáji yā cuñ mil ñayuu**

(Mt. 15.32-39)

**8** Te tiempo un ní candutútú cuéhē ndasí ñayuu, te tuá na vé caji i. Te ni cana Jesús tēe cáscuáha jíin yá, te ni cahān yā:

<sup>2</sup>Cúndáhú ni rī ñayuu yāhá, chi je ni cuu unī quivī cāyúcú i jíin rí, te tuá na vé caji i. <sup>3</sup>Te núu natajī rí i quinhun ndite i vehe i, te cuíta íi i sava ichi, chí íyó sava i jeē jicá véjicoo i, áchí yá.

<sup>4</sup>Te tēe cáscuáha un ní cacahān de:

¿Te ndé nuū nihín yō staā caji i jíināhan i? Chi yāhá tú na ñayuu yúcu, áchí de.

<sup>5</sup>Te ni cajñuhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

<sup>6</sup>Yūcuán na te ni cahān yā jíin ñayuu cuéhē un jēe na cúcōo i. Te ni quihin ya ndihúxá staā ún, te ni nacuatáhú yá nuū Yaā Dios. Te ni tahú cuéchí yá, te ni jēhe ya nuū tēe cáscuáha jíin yá. Te máá de ni casaja de nuū ñayuu cuéhē ún. <sup>7</sup>Te suni cándiso de jecu chācá lúlí. Te ni nacuatáhú yá siquī, te ni cahān yā jeē suni saja de jíināhan de. <sup>8</sup>Te ndíhi i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chítú úxā jica. <sup>9</sup>Te tēe ni cayejí un, íyó nájnūhun cuñ mil de. Te ni nacuatáhú yá nuū ñayuu ún, te cuanungoo i. <sup>10</sup>Yūcuán na te

ni ndívi-ni ya ini barco jíin tēe cáscuáha jíin yá, te cuahān yā región Dalmanuta.

**Jeē ní cajicān de iin jniñu jéhnú nuū**

yā

(Mt. 16.1-4; Lc. 12.54-56)

<sup>11</sup>Yūcuán na te ni quecoo tēe grupo fariseo, te ni caquejéé de stíchí de Jesús. Te cáculi de coto ndee de ya, te ni cajicān de jeē sáha ya iin jniñu jéhnú jeē coo iin seña ichi ándiví. <sup>12</sup>Te ni jitū ni yā siquī jeē tu cáculíje de jíināhan de, te ni cahān yā:

¿Naun cájicān ñayuu yáha iin jniñu jéhnú nuū rí? Jendaá cahán rí jeē ma stéén rí ni iin jniñu jéhnú nuū ñayuu yāhá.

<sup>13</sup>Te ni squéndōo ya de jíināhan de, te ni ndívi tucu ya ini barco, te cuahān yā inga lado mar.

**Jñūhun levadura tēe fariseo**

(Mt. 16.5-12)

<sup>14</sup>Te tēe cáscuáha jíin yá ni canaa ni de condiso de jeē caji de, chí iin-ni pan cánevāha de ini barco.

<sup>15</sup>Te ni ndacu ya jniñu nuū de:

Coto má candíje ró levadura tēe grupo fariseo jíin levadura Herodes, achí yá.

<sup>16</sup>Te ni cacahān tēe cáscuáha un jíin táca jnāhan de:

Va siquī jeē tú na staā ndíso yó, jeē yúcuān cáhán yā súcuān, áchí de.

<sup>17</sup>Te ni jini Jesús, te ni cahān yā: ¿Najehē cándajnūhun ró jeē ni cáhán rí súcuān siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rí súcuān siquī jeē tu cándiso ró

staā? ¿A yóhoyo uun ni rō candíje rō? <sup>18</sup>Iyó tñūu rō ¿te á tu cájito rō? Iyó sóho rō ¿te á tu cájini rō? ¿Te á tu cánucūhun ni rō? <sup>19</sup>Chi ná ni tahú cuéchí rí uhūn staā ni cayejí uhūn mil tēe, ¿te nasaa jīca ni chítú pedazo staā jeē ní canastútú rō? Achí yá.

Te ni cacahān de:

Uxī uū jīca, achí de.

<sup>20</sup>Te suni súcuan ná ni tahú cuéchí rí uxā staā ni cayejí cuūn mil tēe, ¿te nasaa jīca ni chítú pedazo staā jeē ní canastútú rō? Achí yá.

Te ni cacahān de:

Uxā jīca, achí de.

<sup>21</sup>Te ni cahān yā jíin de:

Te nde vijna ¿á ná tu jecūhun ni rō jíjnāhan rō?

Súcuan ni cahān yatá yá jeē ma cándíje de jñūhun stáhú cástéén tēe ún.

**Jeē ní nasávāha ya tēe  
cuáá ñuu Betsaida**

<sup>22</sup>Yūcuán na te ni jinū yā jíin de ñuu Betsaida. Te ni caquindeca ñayuu ñin tēe cuáá núu yā, te ni cacahān ndahú i jíin yá jeē na tēe ya ndaha ya nuū de. <sup>23</sup>Yūcuán na te ni jñi ya ndaha tēe cuáá un, te ni quenehen ya de yatā ñūu ún. Te ni tee ya tesíhi yá tinūú de, te ni tee ya ndaha ya siquī. Te ni cajñūhun yá de núu cuu coto de jecu. <sup>24</sup>Te ni ndacoto de, te ni cahān de:

Jíto ná ñayuu jeē cájica i, te tu jíto cájí ná, chi ná cáa yujnu cáa i, achí de.

<sup>25</sup>Yūcuán na te ni tee tucu ya ndaha ya siquī tinūú de. Te ni ndacoto vāha de, te ni nduvāha-ni

tinūú de, te ni jito cájí de ndíhi-ni.

<sup>26</sup>Te ni natají yá de quinhun de vehe de, te achí yá:

Ma quívi rō ñuu, ni ma cáchi cuiti rō nuū ní ñin, achí yá.

**Jeē ni cáhān Pedro jeē Jesús cúu  
Cristo**

(Mt. 16.13-20; Lc. 9.18-21)

<sup>27</sup>Yūcuán na te Jesús jíin tēe cáscuáha jíin yá, cuahān yā tēcá ndañūu Cesarea Filipo. Te ichi un ní cajñūhun yá de:

Ruhū, ¿ndé ñin cúu ri cácahān ñayuu?

<sup>28</sup>Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun Yaā Dios cúu ní.

<sup>29</sup>Yūcuán na te ni cajñūhun yá de: Te máá rō, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

<sup>30</sup>Te ni ndacu ya jñiñu nuū de jíjnāhan de jeē ma cáchi de jñūhun yáha nuū ní ñin ñayuu.

**Jeē ní castūhún Jesús jeē cúu yā**

(Mt. 16.21-28; Lc. 9.22-27)

<sup>31</sup>Te ni quejéé yá steén yā nuū de: Máá rí, Yaā ní nduu tēe, cánuú ndoho xeēn rī. Te tēe tēe jéhu jíin sūtū cácujeéhu jíin tēe cástéén tutu ley, squéhichí de ruhū, te cahni de ruhū. Te nuū uní quívi te natecu rī, achí yá.

<sup>32</sup>Te cájí ní cahān yā jñūhun yáha. Yūcuán na te Pedro, ni cana

máñúhún de ya, te ni quejéé de cáhán de nuū yā jeē ma cuáha ya jñūhun coo súcuan. <sup>33</sup>Te máá yá ni ndió cóto ya ni jito ya nuū téé cáscuáha jíin yá. Te ni cahán yā nuū Pedro:

Cujiyo quihñin rō, chi cáhán rō ná cáhán Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu, achí yá.

<sup>34</sup>Te ni cana ya téé cáscuáha jíin yá jíin ñayuu cuehē ún, te ni cahán yā:

Na-ni ñayuu núu cúní i condiquñin i ruhū, na cási i jeē cuní máá i, te na cóndiquñin i ruhū te cuáha i jñūhun ndoho i jñúndóho jeē siquí rī, vēsú na cúu i. <sup>35</sup>Chi núu ndé ñayuu cuní i cācu i nuū jñúndóho quiji nuū i jeē siquí ruhū, núu súcuan te jnahñū ndetū i ñí cáni. Te núu ndé ñayuu, vēsú na cúu i jeē siquí ruhū jíin síquí jeē scáca i jñūhun jeē jnáma ri ñayuu, núu súcuan te cotecu i ñí cáni. <sup>36</sup>¿Chi ndé cuajñíñu vēsú na cúndeyí ñayuu nihñin i ñí ñáyiví, te núu quiví i nuū jnahñú ndetū i? <sup>37</sup>Chi tú na jíin cuiti chunaa ñayuu jeē cácu ánuá i. <sup>38</sup>Te ñayuu yáha tu cácadíje cuiti i, te máni máá cuéchi cása ha i. Te núu na-ni ñayuu cúcanu i nuū ñayuu yáha jeē siquí ruhū, Yaā ní nduu tēe, jíin síquí jñūhun cáhán rī, suni súcuan cucanu rī jeē siquí máá i, quiví ndíji rī jíin táca ndajéhé ndoo rī. Te quiví ún chi yōhyo luu cujéhu ri nájnūhun cújéhu Tátá rī. Achí yá.

**9** Te suni ni cahán yā jíin de jíin náhan de:

Jendaá cahán rī jíin ró jeē sava tēe cáhiin yāhá, ma cúu de chi nde cuni de jeē ndácu Yaā Dios jñíñu jíin poder yā, achí yá.

### Jeē tucu ni nduu ya

(Mt. 17.1-13; Lc. 9.28-36)

<sup>2</sup>Yūcuán na te nuū iñú quiví te Jesús ni jeca ya Pedro jíin Jacobo jíin Juan, cuahán síin ya jíin de iñ yucu súcún. Te yūcuán, tucu ni nduu ya nuū de. <sup>3</sup>Te sahma ya ni ndindéé, te ni nducujín quiyí, nájnūhun yuhvā volcán. Te tú ni iñ ñayuu ñáyiví yáha cuu nacate jeē ndúquiyí ndasí súcuan. <sup>4</sup>Te ni cajito de jeē Elías jíin Moisés cándajñuhún de jíin yá. <sup>5</sup>Yūcuán na te ni cahán Pedro jíin Jesús:

Maestro, nacā jeē váha jeē cáhiin na yáha. Te na sáha ná úní vehe ramada, iñ cuu máá ní, inga cuu Moisés, te inga cuu Elías, achí de.

<sup>6</sup>Chi yōhyo ni cayūhu téé cáscuáha ún, te Pedro tu ní sáha de cuenta na vé cúu jeē cahán de. <sup>7</sup>Te ni quiji vicō ñuhun ní jesi-ni nuū de. Te nuū vicó un ní cahán iñ jñūhun:

Yáha cúu Sēhe ri jeē maní ndasí rí jíin. Te na cúni nahín ró jñūhun cáhán yā. Achí.

<sup>8</sup>Te ni candacoto-ni de, te tuá tēe un ní cájito de, chi máá iñ na Jesús.

<sup>9</sup>Te ni cananuu de jíin yá yucu ún. Te ni ndacu ñihñin ya jñíñu nuū de jeē ma cáchi de nuū ní iñ jeē súcuan ni cajito de, chi nde na nátecu máá yá, Yaā ní nduu tēe, achí yá. <sup>10</sup>Jeē yúcuan ní cachuváha de táca jéé ní cuu ún, te cácajnūhun jnáhan de na jñūhun cúu jeē nátecu yā. <sup>11</sup>Te ni cacajñuhún de ya:

Te tēe cástéén tutu ley Yaā Dios, ¿najehe cácahān de jeē cánuú ndiji Elías xihna gā, te sáa te quiji Yaā cúu Cristo? achí de.

<sup>12</sup>Te ni cahān yā:

Jendaá cúu jeē xihna gā quiji iin tēe cúu nájnūhun Elías, te sātūhva de ndihi, áchí tutu. ¿Te ndese cáhān tucu tutu iī siquī ruhū, Yaā ní nduu tēe? Cáhān jeē ndoho xeēn rī, te sájéē ni i nuū rī. <sup>13</sup>Te cáhān rī jíin ró jeē jé ni quiji tēe ni cuu nájnūhun Elías, te ni casáha ndevāha ñayuu jíin de tāca jéē ní cacuu ni maá i, nájnūhun cáhān jnūhun de nuū tútu, áchí yá.

**Jeē ní nasávāha ya iin sūchi ñūhun tachí ini**

(Mt. 17.14-21; Lc. 9.37-43)

<sup>14</sup>Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndūū i de. Te suni cáhiin tēe cástéén tutu ley Yaā Dios, cátejnāhan jíin de. <sup>15</sup>Te nuū ní cajito tāca ñáyuu un jéē véji ya, te ni canaa ni i. Te cájino i cuangoo i nuū yā jeē cahān i jíin yá. <sup>16</sup>Te ni cajnūhun yá i:

¿Na siquī cátejnāhan ró jíin de jíjnāhan de? áchí yá.

<sup>17</sup>Te ni cahān iin tēe íne yūcuán:

Maestro, vendeca ná séhe ná núū ní, chí ñūhun iin tachí ini i, te ni cuñíhín i ni sáha. <sup>18</sup>Te ndé-ni cúu nuū íne i, te tachí un scótúú i, te jéhi yíhí-ni i. Te jéē tiñū yuhu i, te squíhñi jnūhun i. Te cuacuxí ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachí ún, te tu ní cúu sáha de, áchí de.

<sup>19</sup>Te ni cahān yā jíin de jíjnāhan de:

Ñayuu tu cándíje cuiti cácuu ró. ¿Nasaa ga quiví condee rī jíin ró? ¿Te nasaa ga quiví cuandeyí ni rī jíin ró? Cuáquihin sūchí un, na quíji i, áchí yá.

<sup>20</sup>Te ni caquindeca de i nuū yā.

Te nuū ní jito tachí un núū yā, te ni jehni yíhí-ni i. Te ni cotúú i, te cónéhén cócāni i, te jéē tiñū yuhu i.

<sup>21</sup>Te Jesús ni cajnūhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. <sup>22</sup>Te ni cuu cuehē jínu scótúú táchí ún i nuū ñūhún nuū ndúte, jeē cáhni i cúní. Te núu cuu sáha ní, te cundáhú ni ní chindéé ñáhán ní sāna jéē ndúvāha séhe ná, áchí de.

<sup>23</sup>Te ni cahān Jesús jíin de:

Núu cuu candíje ró jéē sáha ri, chí ñayuu candíje te cuu tāca jéē cuní i, áchí yá.

<sup>24</sup>Te maá tátá sūchí un ní cahān jee de:

Cándíje ná, te chindéé ñáhán ní sāna jéē candíje ñihin ga ná, áchí de.

<sup>25</sup>Te ni jito Jesús jeē ní cutútú cuehē ñayuu nuū yā. Te ni cahān yā nuū tachí:

Tachí jeē sañíhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

<sup>26</sup>Yūcuán na te ni cana cóhó táchí ún, te ni jehni yíhí tucu i, te ni quenda cuahān. Te sūchí un ní cuu i nájnūhun ndíyi. Te ni cacahān cuehē ñayuu jeē jé ni jihí i. <sup>27</sup>Te Jesús ni jniñi ya ndaha i, te ni ndonehen ya i, te ni nucuiñi-ni i.

<sup>28</sup>Yūcuán na te ni quívi ya ini ñin vehe, te tēe cáscuáha jíin yá, ni cacajñūhun sñin de ya:

¿Najehē tu ní cúu quenehen ná tachī un jíjnáhan ná? áchí de.

<sup>29</sup>Te ni cahān yā:

Ñin tachī súcuan chí ma quénda cuiti te núu tú cacān tahú rō te coo ndite ni rō, achí yá.

**Jeē ni cahān tucu ya jeē cúu yā**

(Mt. 17.22-23; Lc. 9.43-45)

<sup>30</sup>Te ni quenda ya yūcuan jíin de jíjnáhan de, te ni yāha ya ndañū Galilea cuahān yā. Te tu ní cúni yā jeē cúni ni ñin ñayuu. <sup>31</sup>Chi stéén yā nuū tēe cáscuáha jíin yá, te áchí yá:

Máá rí, Yaā ní nduu tēe, nastúu i ruhū nuū tāca tēe xeēn. Te cahni de ruhū, te núu ni jihī rī, te nuū uní quivī te natecu rī, achí yá.

<sup>32</sup>Te tu ní cájēcūhun ni de jñūhun yáha, te cáyūhú de cajñūhún de ya siquī jñūhun ni cahān yā.

**Ndé ñayuu cúu jeē cujéhnū ga**

(Mt. 18.1-5; Lc. 9.46-48)

<sup>33</sup>Te ni jinū yā jíin de ñuu Capernaum, te nuū ni quívi ya ini vehe, te ni cajñūhun yá de:

¿Na jñūhun ni candajñūhun ró ichi véji yó? áchí yá.

<sup>34</sup>Te tu ní cácahān cuiti de, chí ichi un ní cacahān de siquī núu ndé ñin de cújéhnū ga. <sup>35</sup>Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñin ró cúni cujéhnū ga, na cúu ró tēe núu ga nuū tāca jnáhan ró, te cuajñūhun ró núu jnáhan ró.

<sup>36</sup>Yūcuán na te ni jñi ya ndaha ñin sūchi lúli, te ni jeni ya i mēhñū

de jíjnáhan de. Te ni nundee yā i, te ni cahān yā jíin de:

<sup>37</sup>Na-ni ñayuu núu jeē siquī ruhū jetáhú i ñin sūchi lúli nájnūhun sūchi yáha, te ruhū jetáhú i. Te ñayuu jetáhú rúhū, nasūu máá ñin-ni ruhū, chí suni Yaā ní tají rúhū jetáhú i, áchí yá.

**Ñayuu tu cáhán siquī yā, ñin i jíin yā**

(Mt. 10.42; Lc. 9.49-50)

<sup>38</sup>Yūcuán na te ni cahān Juan jíin yá:

Maestro, ni cajito ná ñin tēe jeē jíin sñhví ní quenehen de tachī ini ñayuu. Te ni cajesi ná jēe sáha de, chí tu jíca de jíin yó, achí de.

<sup>39</sup>Te ni cahān Jesús jíin de:

Ma cási rō jeē sáha de. Chí ni ñin tēe jeē jíin sñhví rí sáha de jñiñu jéhnū, ma cúu nacahān de siquī rī.

<sup>40</sup>Chí tēe tu cáhán siquī yō, ñin de jíin yó. <sup>41</sup>Te na-ni ñayuu núu jeē siquī ruhū cuāha i vēsú ñin ñajin ndute coho ró, siquī jeē cácañdije ró ruhū, ndaā ndije cúu jeē nihín i tahū i. Achí yá.

**Xeēn coo siquī ñayuu quívi nuū cuéchi**

(Mt. 18.6-9; Lc. 17.1-2)

<sup>42</sup>Te núu ñin sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñin yōso cáhnu sucūn ñayuu ún, te quēe i chíji ndute mar nuú. <sup>43</sup>Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chí vāha ga jeē cóndee ñin-ni ndaha ró te quívi ró núu cotecu rō níí cáni, vēsú jeē cóndee ndíndúu ndaha ró te quívi

ró infierno, nuū cayú ñuhūn jeē ma ndahvá cuiti. <sup>44</sup>Te yūcuán chi tu cájihī tindacú, te tu ndáhvá cuiti ñuhūn. <sup>45</sup>Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu rō níí cáni, vēsú jeē cóndee ndíndúú jehē rō te quívi ró infierno, nuū cayú ñuhūn jeē ma ndahvá cuiti. <sup>46</sup>Te yūcuán chi tu cájihī tindacú, te tu ndáhvá cuiti ñuhūn. <sup>47</sup>Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu Yaā Dios jniñu jíin iin na tinūu ró, vēsú jeē cóndee ndíndúú tinūu ró te quívi ró infierno. <sup>48</sup>Te yūcuán chi tu cájihī tindacú, te tu ndáhvá cuiti ñuhūn.

<sup>49</sup>Chi nájnūhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuá sáha ñīī. <sup>50</sup>Vāha íyó ñīī, te núu ñīī ún na náā jeē uhvuá, ¿te ndese nduu uhvuá tucu sáha ró? Núu súcuan te cuu ró ñayuu váha, nájnūhun íyó váha ñīī. Te na cóyūcu váha ró jíin jnāhan ró. Achí yá jíin de.

**Siquí jeē ma stóo jnāhan tēe jíin ñahan**

(Mt. 19.1-12; Lc. 16.18)

**10** Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jnūhun nuū i, nájnūhun sáha ya. <sup>2</sup>Yūcuán na

te jecu tēe grupo fariseo ni quecoo de nuū yā, chí cácuni de coto ndee de ya núu ndese cahān yā. Te ni cacajnūhún de ya núu íyó ley jeē cuu ndusíin iin tēe jíin ñasihí de.

<sup>3</sup>Te ni cahān yā jíin de:

¿Na jniñu ni ndacu Moisés nuū rō nde jenahán?

<sup>4</sup>Te ni cacahān de:

Moisés ni jēhe de jnūhun jeē cúvāha iin acta jeē ndusíin de jíin ña, te ndōo ña, áchí de.

<sup>5</sup>Te ni cahān Jesús jíin de:

Siquí jeē níhni ni rō jijnáhan ró, jeē yūcuan ní ndacu de jniñu yáha núu rō.

<sup>6</sup>Te nde xihna ñúhún, ná ni sáha Yaā Dios ndíhi, chí tēe jíin ñahan ni sáha ya. <sup>7</sup>Jeē yūcuan cúu jeē stóo tēe tátá de náná de, te quijnáhan de jíin ñasihí de. <sup>8</sup>Te iin na cuu ndíndúú de, áchí Yaā Dios. Núu súcuan te tuá cúu uū jnāhan de, chí iin na cúu. <sup>9</sup>Jeē yūcuan tu íyó váha jeē stóo jnāhan, chí jeē ni squíjnāhan Yaā Dios cúu, áchí yá.

<sup>10</sup>Te tēe cáscuáha ún nuū ni quívicoo de vehe, te ni cacajnūhún tucu de ya siquí jnúhun ún. <sup>11</sup>Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndēe de ñasihí de. <sup>12</sup>Te núu iin ñahan stóo ña yīi ña te condeca ña inga tēe, suni cásiquí ndēe ña de. Achí yá.

**Jeē ni jícān tahú Jesús jehē sūchi lúli**

(Mt. 19.13-15; Lc. 18.15-17)

<sup>13</sup>Yūcuán na te ni quecoo ñayuu jíin sūchi lúli, jēe na sóo yá ndaha ya xinī i. Te tēe cáscuáha jíin yá, ni cacahān de nuū ñayuu vējicoo jíin i. <sup>14</sup>Te ni jito Jesús, te ni quitī ni yā, te ni cahān yā jíin de:

Cuāha jnūhun na quǵjicoo sūchi lúli jíñā nuū rī, te ma cásí rō jeē quǵjicoo i. Chi ñayuu jeē ndió cóo ni i caní ni i nájnūhun sūchi yáha, suu i quǵvi ndaha Yaā andívi jeē ndacu ya jniñu nuū i. <sup>15</sup>Te jendaá cahán rī jíñ rō, núu ñin ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñin sūchi lúli, ma quǵvi cuiti i ndaha ya, achí yá.

<sup>16</sup>Te ni mundeé ya i, te ni soó yá ndaha ya xiní i, te ni jicān tahú yā jehē i jíñáhan i.

### Jnūhun tēe cúaá

(Mt. 19.16-30; Lc. 18.18-30)

<sup>17</sup>Yūcuán na te ni quihin tucu ya ichi cuahān yā. Te jínu ñin tēe ni quee de, te ni jecuiñi yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihin tahú na cotecu na ní caní andívi? achí de.

<sup>18</sup>Te ni cahān yā jíñ de:

¿Naun cáhán rō jeē tēe vāha cúu rí? Tú ni ñin tēe vāha íyó, chi máá ñin-ni Yaā Dios. <sup>19</sup>Je jíni rō tēcá jniñu ní ndacu Yaā Dios: Ma cosíquí ndéé jnáhan rō. Ma cáhni rō ndíyi. Ma sacuíhná rō. Ma sajnūhún rō. Ma stahú rō jnáhan rō. Cuatáhú rō nuū tatá rō nuū naná rō. Achí yá.

<sup>20</sup>Te ni cahān tēe un jíñ yá:

Tēcá jniñu yáha je ni squícu ná ndé ná lúli ná, Maestro, achí de.

<sup>21</sup>Yūcuán na te ndáhú jíto ya nuū de jeē cúsiñi ni yā jíñ de. Te ni cahān yā:

Ñin na jniñu cúmaní sáha rō núu súcuán. Cuáhán te xico rō ndíhi jeē névāha rō, te cuāha rō núu ñayuu ndahú. Te nde andívi cuāha ya jeē

vāha ndasí núu rō. Yūcuán na te quiji rō condiquin rō ruhū, te cuāha rō jnūhun ndoho rō jnúndóho jeē siquí rī, achí yá.

<sup>22</sup>Te ná ni jini sōho de jnūhun yáha, te ni jnahuhū ni de, te cúcuíhyá ni de cuahān de, chi cúcá ndasí de.

<sup>23</sup>Yūcuán na te Jesús ni ndacoto ya ní xiin ya, te ni cahān yā jíñ tēe cáscuáha jíñ yá:

Tēe cúcá chi yōhyo yí quǵvicoo de ndaha Yaā Dios jeē ndacu ya jniñu nuū de, achí yá.

<sup>24</sup>Te tēe cáscuáha jíñ yá, yōhyo ni canaa ni de jeē ní cajini de jnūhun ni cahān yā. Te ni cahān tucu ya jíñ de:

Séhē, ñayuu ténuū xūhún, yōhyo yí quǵvicoo i ndaha Yaā Dios jeē ndacu ya jniñu nuū i. <sup>25</sup>Yachí gā yāha ñin camello yaū yutícuí, vēsú jeē quǵvi ñin ñayuu cucá ndaha Yaā Dios jeē ndacu ya jniñu nuū i, achí yá.

<sup>26</sup>Te víhyá gā ni canaa ni de cájini de, te ni cacajnūhun jnáhan de:

¿Ndé ñayuu cúu jeē cácu núu súcuán?

<sup>27</sup>Te ni ndacoto ya nuū de, te ni cahān yā:

Ñayuu chi ma cúu squǵvi i máá i ndaha Yaā Dios, te máá yá chi cuu sáha ya, chi ndíhi-ni jniñu cuu sáha ya, achí yá.

<sup>28</sup>Yūcuán na te ni cahān Pedro jíñ yá:

Sāna jíñáhan ná, ní castóo ná ndíhi jeē cánevāha ná, te cándiquin na níhín, achí de.

<sup>29</sup>Te ni cahān Jesús:

Jendaá cahán rí jíñ rō jíñáhan rō, núu na-ni ñayuu stóo i vehe, chí

ñani, chí cuáha, chí tátá, chí náná, chí ñasihí, chí séhe, chí ñuhun, jeē siquí ruhū jíin síquī jeē scáca i jñuhun jeē jnáma ri ñayuu, <sup>30</sup>núu súcuan te nanihīn i iin ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéē cóto xeēn ñayuu i. Te nde inga vida quiji te cotecu i níí cáni. <sup>31</sup>Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chí ndujéhnu i, áchí yá.

**Jeē ni cáhān tucu ya jeē cúu yā**

*(Mt. 20.17-19; Lc. 18.31-34)*

<sup>32</sup>Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te cánaa ni de ni cajini sōho de jñuhun ni cahān yā. Te cáyūhú de cuángoo de jíin yá. Yūcuán na te ni cana sñin tucu ya ndihúxí uū tēe cáscuáha, te ni quejéé yá cástūhún tucu ya nuū de tāca jéē quíji siquī yā. <sup>33</sup>Achí yá:

Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de siquí ri jeē cúu rī, te squívi de ruhū nuū tēe nación Roma jeē cáyūcú Jerusalén cándacu jniñu. <sup>34</sup>Te tāca tēe un sácata de nuū rī, te cani de ruhū, te tesihí de nuū rī, te sáá te cahni de ruhū. Te nuū uní quívī te natecu rī, achí yá.

**Jeē ni jícān Jacobo jíin Juan iin favor nuū yā**

*(Mt. 20.20-28)*

<sup>35</sup>Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cácuni na jéē sáha ní iin jeē cacán na núu ní, áchí de.

<sup>36</sup>Te ni cahān yā jíin de:

¿Ndese cácuni rō jeē sáha ri jíin rō? achí yá.

<sup>37</sup>Te ni cacahān de:

Cuāha ní jñuhun jeē cónēne ná xiin ní quívi ndujéhnu ní, iin ná lado váha ní, te inga ná lado jecó ní, áchí de.

<sup>38</sup>Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájñuhun jeē quíji siquí rī? ¿Te á canda ró ndoho xeēn rō nájñuhun ndoho rī? achí yá.

<sup>39</sup>Te ni cacahān de:

Cuu sáha ná.

Te ni cahān yā jíin de:

Jendaá jeē ndoho ró jnúndóho nájñuhun jeē quíji siquí rī, te ndoho xeēn rō nájñuhun ndoho rī. <sup>40</sup>Te jeē cónēne ró lado váha ri jíin lado jecó rī, nasūu rúhū cúu jeē cuáha jñuhun. Chí je íyó túhva cuu tāca tēe jeē ní nacāji Tátá rī, te tēe un níhīn, achí yá.

<sup>41</sup>Te uxí gā tēe cáscuáha un, ní cajini de jñuhun yáha, te ni caquiti ni de nuū Jacobo jíin Juan. <sup>42</sup>Te Jesús ni cana ya de, te ni cahān yā jíin de:

Cájini rō ndese cásahta tēe cácujuhnu nuū ñayuu tācá nación. Chí cándacu níhīn de jniñu nuū i, te máá de cáchí ndese coo. <sup>43</sup>Te máá ró jijnáhan ró, chí ma sáha ró súcuan. Chí núu ndé iin ró cúní cujuhnu, sa suhva cuajniñu ró núu jnáhan ró. <sup>44</sup>Te núu ndé iin ró cúní cuu nuū, sa suhva sáha ró máá ró mozo nuū tāca jnáhan ró. <sup>45</sup>Chí



suní súcuan sáha ruhū, Yaā ní nduu tēe, chí nasūu jeē vējí ri jeē cuajníñu ñayuu nuū rī, chí sa suhva vējí ri jeē cuajníñu ri nuū ñayuu. Te cuāha ri maá rí cuu rī návāha jnama ri cuehē ñayuu, achí yá.

**Jeē ní nasávāha ya Bartimeo tēe  
cuáá**

(Mt. 20.29-34; Lc. 18.35-43)

<sup>46</sup>Yūcuán na te ni jinū yā ñuu Jericó jíin tēe cáscuáha jíin yá. Te sáá te ni quenda ya yūcuan jíin de jíin ñayuu cuehē ndasí. Te Bartimeo tēe cuáá, sēhe Timeo, néne de yuhíchi, jícan de caridad. <sup>47</sup>Te ni jini de njūhun jeē Jesús ñuu Nazaret vējí ya. Te ni quejéé de cána jee de:

Jesús Sēhe yucūn David, cundáhú ni ni sáña, achí de.

<sup>48</sup>Te cuehē ñayuu ni cacahān i nuū de jeē na cásí de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

<sup>49</sup>Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáá un:

Ndeyí coo ni rō. Ndocuiñī, na quíhín yō, chí cána ya rohó, achí i jíin de.

<sup>50</sup>Yūcuán na te ni scāne de ticāchí de, te yachī ni ndocuiñī de, te ni jinū de nuū Jesús. <sup>51</sup>Te ni cahān yā jíin de:

¿Na vé cuní rō jeē sáha ri jíin ró?

Te máá de ni cahān de:

Maestro, jeē na ndúndijin tinūu ná cuní na, achí de.

<sup>52</sup>Te ni cahān Jesús jíin de:

Cuáhán núu súcuan. Ni candíje ró jeē cuu nasávāha ri rohó, te jeē yúcuán ní nduvāha ró, achí yá.

Te ni ndundijin-ni tinūu de, te ni ndiquin de Jesús cuahān de jíin yá ichi ún.

**Jeē ni quívi Jesús ñuu Jerusalén**

(Mt. 21.1-11; Lc. 19.28-40; Jn. 12.12-19)

**11** Te ni cuyajni ya ñuu Jerusalén, vējí ya ñuu Betfagé jíin ñuu Betania, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. <sup>2</sup>Te achí yá jíin de:

Cuángoo ñuu lulí íne ichi núu. Te núu ni quívi-ni ró yúcuán, te nihīn rō ñin burro núhni tī, jeē ní ñin tēe ná tu coso de tí. Te ndají ró tī, quíjicoo ró jíin tí. <sup>3</sup>Te núu ndé ñin cajnúhún naun cándají ró tī, te cachi rō: Máá Jítóho yō jíni ñúhún yá tī, te yachī natají yá tī ndiji tí, achí rō. Achí yá jíin de.

<sup>4</sup>Te cuangoo de, te ni canihīn de burro un núhni tī yehyí núu quéhe nuū náquijnáhan ichi. Te ni candají de tí. <sup>5</sup>Te sava ñayuu cáhiin yúcuán ní cacahān jíin de:

¿Na vé cúu jeē casáha ró jeē cándají ró burro jíñā? achí i.

<sup>6</sup>Yūcuán na te ni cacahān de nájnūhun ni cachi Jesús. Te ni casiáá i tí vējicoo de jíin tí. <sup>7</sup>Te ni ndecoo de jíin tí nuū Jesús, te ni casoó de sahma de siquī tī, te ni jecosō yā tī. <sup>8</sup>Te cuehē ñayuu ni cascáá i sahma i ini ichi. Te sava ga i ni cajehnde i ndaha ñúu, te ni cachucun i ini ichi ún.

<sup>9</sup>Te ñayuu cuangoo ichi núu jíin ñayuu cuangoo ichi yátá, cácana jee i:

Yōhyo cújéhnu ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios. <sup>10</sup>Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnu máá Yaā Dios. Achí i.

<sup>11</sup>Te ni quiví Jesús ñuu Jerusalén, jíin ini templo cáhnu. Te ni jito ya nuū tācá ndajniñu yúcu níi yúcuan. Te ni quenda ya cuahān yā ñuu Betania jíin ndihúxí uū de, chi je ni ini.

### Jeē ni cáhān yā nuū yújnu higo

(Mt. 21.18-19)

<sup>12</sup>Te inga quiví ún, nuū ní quenda ya ñuu Betania cuahān yā jíin de, te jíi yā sōco. <sup>13</sup>Te nde jicá ni jito ya ñin nundēhe higo jeē íin ndaha. Te ni jecondēhe yá núu sanaa te nihīn yā ndehē caji yā. Te tú na vé ni níhīn yā, chi máá ndaha-ni íin. Chi nasūu tiempo ndehē cúu. <sup>14</sup>Yūcuán na te ni cahān yā nuū yujnu ún:

Tuá na ndehē cuun cuítí xiní rō jeē caji ñayuu, achí yá.

Te tēe cáscuáha jíin yá ni cajini de jeē súcuan ni cahān yā.

### Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

<sup>15</sup>Te ni najinū yā jíin de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quiti te cánaxico núu ñayuu jeē socó i. Te ni scotúú ndeyí ya tāca mesa tēe cástáyí xūhún, jíin silla tēe cáxicó paloma. <sup>16</sup>Te tu ní jéhe ya jnūhun jeē yáha ñayuu ini templo jíin ndajniñu ndíso i. <sup>17</sup>Te ni steén yā jnūhun nuū i, achí yá:

Yósó núu tútu íi jeē cahán Yaā Dios: Vehe ri chi vehe nuū cájicān

tahú ñayuu tācá nación cúu, achí yá. Te máá rō jíināhan rō chi nájnūhun yaū cava ñacuihna ní canasáha rō, achí yá.

<sup>18</sup>Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéhnu ga máá yá vēsú máá de, chi tāca ñayuu yōhyo cácusíi ni i cájini i jnūhun stéén yā. <sup>19</sup>Te jeē cuácuaa, te ni quenda ya ñuu Jerusalén cuahān yā.

### Jeē ni íchī nundēhe higo

(Mt. 21.20-22)

<sup>20</sup>Te jenēhen inga quiví ni nayāha ya jíin de cuahān yā. Te ni cajito de jeē nundēhe higo un je ni ichí nde yoho. <sup>21</sup>Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni ichí caján, achí de.

<sup>22</sup>Te ni cahān Jesús jíin de:

Candíje rō jéé sáha Yaā Dios jeē jicán rō. <sup>23</sup>Chi jendaá cahán rí jíin rō, núu ndé ñayuu cahán i jeē cújiyo yucu yáha quihīn nde nuū mar, te núu tú nacani siquí ni i, chi sa suhva candíje i jeē cóo nájnūhun ni cahān i, yūcuán na te cundaā jeē ni jíicān i. <sup>24</sup>Jeē yúcuan cáhán rí jíin rō, tāca jéé cacán tahú rō, te núu candíje rō jéé nihín rō, te nihín rō. <sup>25</sup>Te jeē cájicān tahú rō, te cone cáhnu ni rō nuū ñayuu casáha cuēchi siquí rō, návāha máá Tátá rō jeē ndeé yá andiví, suni cone cáhnu ni yā nuū cuéchi rō. <sup>26</sup>Chi núu tú cone cáhnu ni rō nuū jnáhan rō, te suni máá Tátá rō jeē ndeé yá andiví,

ma cóne cáhnu ni yā nuū cuéchi ró, áchí yá.

### Siquī jeē ndíso jníñu Jesús

(Mt. 21.23-27; Lc. 20.1-8)

<sup>27</sup>Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sutū cácujeñhu jíin tée cástéén tutu ley Yaā Dios jíin tée jéñhu cándacu jniñu, ni quecoo de nuū yā. <sup>28</sup>Te ni cacajnūhún de ya:

¿Ndé ní nihīn jníñu ró jéē sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? áchí de.

<sup>29</sup>Te ni cahān Jesús:

Suni ruhū, cajñūhun rí rohó ñin jñūhun jíjnáhan ró. Te núu cuu stífo cuñí rō, yūcuán na te cachi rí nuū rō ndé ní nihīn jníñu ri jeē sáha ri jniñu yáha. <sup>30</sup>¿Ndé ñin ni tee jniñu siquī Juan jeē ni scuándute de? ¿A Yaā Dios chí táca tée? Cachi nuū rí, áchí yá.

<sup>31</sup>Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácañdije ró de? <sup>32</sup>Te núu cahān yō jeē ñáyuu ni catee jniñu un síquī de, te quitī ni ñáyuu nuū yō, áchí de cácahān maá de.

Chi cáyūhú de jeē quitī ni ñáyuu, chi ndívii i cácañdije i jeē tée ni nacani jñūhun Yaā Dios ni cuu ndije Juan. <sup>33</sup>Jeē yúcuan ní cacahān de jíin yá:

Tu cájini rí, áchí de.

Yūcuán na te ni cahān Jesús:

Ni ruhū, suni ma cáchi rí nuū rō ndé ñin ni tee jniñu siquī rí sáha ri jniñu yáha, áchí yá.

### Jñūhun yátá síquī tēē néé cásjáñiñu nuū uva

(Mt. 21.33-46; Lc. 20.9-19)

**12** Te ni quejéé yá cahán yā jñūhun yátá jíin de jíjnáhan de:

Ñin tēē ni nachuhun de cuehē uva, te ni jesi de corral, te ni sáha de ñin nuū cúhun ndehē un táxin. Te ni sáha de ñin vehe súcún návāha cuu coto de níí cáhnu.

Te ni stóo de nuū sava tēē sáñiñu nuū, te cuu sava de ndehē jíin. Te ni tee de ichi cuahān jíca de. <sup>2</sup>Te máá tiempo ndutútú uva, te ni tají de ñin mozo de cuanuquihin sava uva nuū tēē cásjáñiñu ún. <sup>3</sup>Te tēē un ní cajñi de mozo un, te ni cacani de i, te ni canatajé de i cuanuhun i súcuan-ni. <sup>4</sup>Yūcuán na te tēē chíí uva un ní tají tucu de ñinga mozo cuahān. Te tēē cásjáñiñu un ní cajēhe de yuū xiní mozo un, te ni castújí de, te ni cacahān ndevāha de nuū. <sup>5</sup>Te tēē chíí uva ni tají tucu de ñinga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

<sup>6</sup>Te tēē chíí uva, íyó ñin sēhe de jeē maní ndasí de jíin. Te jeē sándihí na ni tají de sēhe de un cuahān nuū tēē cásjáñiñu. Te jéni ni de: Tēē ún chi cuatáhú de jíjnáhan de nuū sēhe ri. <sup>7</sup>Te tēē cásjáñiñu un ní cacahān maá: Tēē chíí táhū cúu jeē yáha. Na cáhni yō de, te ndōo tahū de cuu máá yó, áchí. <sup>8</sup>Te ni cajñi de i, ni cajehni de i, te ni cascāne de i ñinga lado. Achí yá. <sup>9</sup>Yūcuán na te ni cajñūhun yá de:

Núu súcuan ¿te ndese sáha tēē chíí uva un? Ndiji de te cahni

de tēe cásajniñu ún, te cuāha de ñuhun cáa uva un núu inga sava tēe sájniñu nuū.

<sup>10</sup>¿Te á ná tu cahu ró jnúhun yáha jéē yosó núu tútu iī, jeē ruhū cúu nájnūhun iin yuū? Chi áchí tutu:

Yuū jeē ní casquéhichī tēe cájeni vehe,  
yuū yáha nduu jeē quítuu vehe.

<sup>11</sup>Máa Jítóho yō Yaā Dios ni sáha ya súcuan,  
te cánaa ni yō jíto yó jniñu yáha. Achí tutu, achí yá.

<sup>12</sup>Yūcuán na te ni canducú de modo jniī de ya. Chi ni cajecūhun ni de jeē siquī maá de cúu jnúhun yátá ní cahān yā siquī tēe cásajniñu nuū uva jíin tēe cájeni vehe. Te siquī jeē cáyūhú de jeē quitī ni ñayuu, te ni castóo de ya te cuangoo de.

### Siquī xúhun renta

(Mt. 22.15-22; Lc. 20.20-26)

<sup>13</sup>Yūcuán na te ni catajī de sava tēe grupo fariseo jíin tēe grupo Herodes cuangoo de nuū yā, ndúcú de ndese sáha de návāha cahān yā iin jnúhun jeē nihín de cuēchi siquī yā. <sup>14</sup>Te ni quecoo de, te ni cacahān de jíin yá:

Maestro, cájini na jéē tēe cáhan ndaā cúu ní, te tu yúhú ní jeē cahán ni iin ñayuu siquī ní. Chi tu sáha ní cuenta ndese cúu iin iin i, chi inuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jniī nación yō, chí tuú? ¿A chúnaa yō, chí má chúnaa yō? Achí de jíin yá.

<sup>15</sup>Te máa yá jíin yā jeē stahú-ni de, te ni cahān yā jíin de:

¿Najehē cájito ndee rō ruhū?

Cuāha iin xūhún na cóto ri, achí yá.

<sup>16</sup>Te ni cajēhe de xūhún. Te ni jito ya, te ni cajnúhun yá de:

¿Ndé iin nuū cúu jeē ndeé nuū xúhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, achí de.

<sup>17</sup>Yūcuán na te ni cahān yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

### Jeē ní cacajnúhún de siquī jeē nátecu ndíyi

(Mt. 22.23-33; Lc. 20.27-40)

<sup>18</sup>Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiitī ndíyi. Te ni cacahān de jíin yá siquī iin jnúhun, achí de:

<sup>19</sup>Maestro, Moisés ni tee de nuū tútu jeē cánevāha yó: Núu iin tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi i nuū ndíyi ñani de, achí tutu. <sup>20</sup>Núu súcuan te ni íyo uxā ñani. Te tēe núu ní quijnāhan de jíin ñahan. Te ni jihī de, te tú sēhe de ní íyo. <sup>21</sup>Te tēe uū ni naquihin de ña, te suni ni jihī de, te tú sēhe de ní íyo. Te suni súcuan tēe unī. <sup>22</sup>Te ndíhúxá de ni condeca de ña, te ni iin de tú sēhe de ní íyo. Te jeē sándihí te suni ni jihī ñahan ún.

<sup>23</sup>Núu súcuan te núu na nátecu de

jíjnáhan de quiv̄i nátecu nd̄iyi, ¿te ndé iin de cuu ña ñasihí de? Chi ndihúxá de ni condeca de ña. Achí de jíin yá.

<sup>24</sup>Yücuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahán tutu iī, ni tu cájini rō jeē iyó poder Yaā Dios jeē nastécu yā nd̄iyi. <sup>25</sup>Chi quiv̄i nátecu nd̄iyi, te tuá na jnūhun quijnáhan tēe jíin ñahan coo. Chi coo i nájnūhun ndajéhé Yaā Dios andiv̄í. <sup>26</sup>Te siquī jeē nátecu nd̄iyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. <sup>27</sup>Chi vēsú je ni cajihí de, te cátecu de nuū iyó máá yá, chi cúu ya Yaā sáha jeē técu ñayuu ní cáni. Yōhyo cástívi ró jnūhun núu súcuan. Achí yá jíin de.

**Jniñu cánuú ndasí gá jeē ní ndacu  
Yaā Dios**

(Mt. 22.34-40)

<sup>28</sup>Te ni quee iin tēe stéén tutu ley Yaā Dios, te ni jini de jeē castíchi jnáhan tēe un jíin Jesús. Te ni jini de jeē váha ni nastió cuñí yā jnūhun. Te ni cajnūhún de ya:

¿Nde iin cúu jnūhun ndácu jniñu cánuú ndasí gá nuū táca gá jniñu ni ndacu ya jenahán? áchí de.

<sup>29</sup>Te ni cahān Jesús jíin de:

Yáha cúu jniñu jeē cánuú ndasí gá nuū táca gá. Achí tutu: Ñayuu Israel, cuni nahín ró. Máá Jítoho yō Yaā Dios, maá iin-ni ya iyó. <sup>30</sup>Núu súcuan te coo maní ndasí ró jíin máá Jítoho rō Yaā Dios, nde jnāá

ndasí ró sáha ró ndihi jeē cúsiī ni yā, nde jíin ini jíin ánuá rō, jíin ní jeē níjnūní rō, jíin ní fuerza rō. Yáha cúu jniñu ndácu ya jeē cánuú ndasí gá. <sup>31</sup>Te jniñu uū jeē ní ndacu ya, suni súcuan cáhán: Cundáhú ni rō jnáhan ró nájnūhun cundáhú ni rō maá ró. Tuá inga jnūhun ndácu jniñu cánuú gá iyó, chi suu máá jéé yáha-ni. Achí yá jíin de.

<sup>32</sup>Yücuán na te ni cahān tēe stéén tutu ley jíin yá:

Váha ni cahān ní, Maestro. Chi ndaā chi iyó iin-ni Yaā Dios, te tuá na inga yā iyó. <sup>33</sup>Te cánuú jéé coo maní ndasí yó jíin yá nde jíin ini jíin ánuá yō, jíin ní jeē níjnūní yō, jíin ní fuerza yō, te cundáhú ni yō jnáhan yó nájnūhun cundáhú ni yō maá yó. Te cánuú ndasí gá jeē yáha vēsú jeē cáhmu yó quiti jíin táca gá jeē socó yō nuū yā. Achí de jíin yá.

<sup>34</sup>Yücuán na te ni jini Jesús jeē váha ni stiío cuñí de, te ni cahān yā jíin de:

Je yajni cuu quiv̄i ró ndaha Yaā Dios jeē ndacu ya jniñu nuū rō, achí yá.

Yücuán na te ni iin ga de, tuá ni chúndeyí ni de cajnūhún de ya.

**Siquī jeē cúu Cristo sēhe yucūn David**

(Mt. 22.41-46; Lc. 20.41-44)

<sup>35</sup>Te stéén Jesús jnūhun ini templo, te ni cahān yā:

¿Nde se cúu jeē cácahān tēe cástéén tutu ley Yaā Dios jeē Cristo cúu sēhe yucūn David? <sup>36</sup>Chi máá David suhva ni cahān de jnūhun ya ni sáha Espíritu Santo nde jenahán:

Máá Jítoho yō Yaā Dios ni cahān yā jíin Jítoho rí, Yaā quiji:

Cucōo ró lado váha ri nuū  
 cujéhnú ró,  
 te na sáha ri jeē quende rō  
 poder tāca jēē cájito uhū rohó.  
 Achí Yaā Dios. Achí David. <sup>37</sup>Te núu  
 sēhe yucūn David cúu Cristo, ¿te  
 ndese cúu jeē ni cáhān de jeē Jítóho  
 de cúu ya? áhí yá.

Te ñayuu cuehē, cánujnahan ni i  
 cájini nahín i tāca jnúhun cáhān yā.

**Jeē ni cáhān yā jeē iyó cuéchi de  
 jíjnāhan de**

(Mt. 23.1-36; Lc. 11.37-54; 20.45-47)

<sup>38</sup>Te stéén yā jnúhun, te ni cahān  
 yā jíin i:

Coto má candíje ró táca tée  
 cástéén tutu ley. Chi cácusī ni de  
 cáñuhun de sahma cáni jeē steén  
 jeē cujéhnú de, cájica cuu de jíin.  
 Te cánujnahan ni de jeē cahān  
 yiñúhún ñayuu jíin de ini calle.  
<sup>39</sup>Te cánujnahan ni de cucōo de  
 nuū silla yiñúhún gá ini vehe i  
 sinagoga, jíin silla yiñúhún gá nuū  
 víco cáyeji ñayuu. <sup>40</sup>Te cáquende de  
 vehe ñahan ní caquendōo ndáhú. Te  
 nahán cájicān tahu de návāha cani  
 ni ñayuu jeē tú na cuéchi de. Tēe  
 yáha jíjnāhan de chi xeēn gā ndoho  
 de castigo. Achí yá.

**Jeē ni sócō ñahan viuda xūhún**

(Lc. 21.1-4)

<sup>41</sup>Te iin quivī néne Jesús ini  
 templo ichi núu tāca yéjnū nuū  
 casocō i xūhún. Te jító ya ndese  
 cáchuhun ñayuu xūhún ini yejnū  
 ún. Te cuehē ñayuu cucá ní  
 cachuhun i cuehē xūhún. <sup>42</sup>Te ni  
 quee iin ñahan viuda jeē ndóho  
 ndáhú. Te ni chuhun ña uū centavo  
 lulí ini yejnū ún. <sup>43</sup>Yūcuán na te ni

cana ya tēe cáscuáha jíin yá, te ni  
 cahān yā jíin de:

Jendaá cahān rī jíin ró jeē cuehē  
 gā cúu jeē ni sócō ñahan viuda  
 ndahú yáha, vēsú jeē ní casocō tāca  
 ñayuu cucá. <sup>44</sup>Chi tācá i ni casocō i  
 jeē ni ndóo siquī xúhun cuéhē i. Te  
 ñahan yáha, vēsú ndahú ndóho ña,  
 te ni chuhun ndihi ña jeē cótecu ña.  
 Achí yá jíin de.

**Jeē ní cachi yā jeē nāa templo**

(Mt. 24.1-2; Lc. 21.5-6)

**13** Te ni quenda Jesús ini  
 templo cáhnu, te iin tēe  
 scuáha jíin yá ni cahān de:

Maestro, condēhe ní ná luu jító  
 tācá vehe yáha jēē cúu templo, jíin  
 tāca yūū jeē ní cuvāha, áhí de.

<sup>2</sup>Te ni cahān yā jíin de:

Tācá vehe nāhnu yāha jēē cájito  
 ró, chi ma cóso jnāhan ga ni iin  
 yūū, chi ndihi jnanū. Achí yá.

**Na seña coo nuū cuacuyajni ndihi  
 ñayiví**

(Mt. 24.3-28; Lc. 21.7-24; 17.22-24)

<sup>3</sup>Te ni jehēn yā jíin de yucu  
 Olivos jeē íne ichi núu templo  
 cáhnu. Te ni cucōo ya yūcuán. Te  
 Pedro jíin Jacobo jíin Juan jíin  
 Andrés ni cacajnúhun sīn de ya:

<sup>4</sup>Castūhun ní nuū ná, ¿ndé quivī  
 coo tāca jēē ní cachi ní jēē coo? ¿Te  
 na seña coo núu cuacuyajni squícu  
 tāca jēē ni cáhān ní? áhí de.

<sup>5</sup>Te ni cahān yā jíin de:

Coto ró jēē ma stahú ni iin de róhó.  
<sup>6</sup>Chi quijicoo cuehē tēe jeē stahú jíin  
 síhví rí. Máá rí cúu Cristo, achi de.  
 Te súcuán stáhú de cuehē ñayuu.

<sup>7</sup>Te nihín rō jnúhun jeē tāca  
 lado iyó guerra, chí je yajni coo

guerra. Te ma yūhu ró, chi cánúú coo súcuan. Te ni ná tu jinū quivī ndíhi ñayiví. <sup>8</sup>Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jnáa, te coo jnamā, te ndonda ñayuu siquī jnáhan i. Te tāca jéé yáha cácuu jnūndóho quejéé xíhna ñúhún gá.

<sup>9</sup>Te condito ró máá ró, chi nastúu i róhó núu tāca tóhō, te ini tācá vehe ii sinagoga caní i róhō. Te quindeca i sava ró núu tācá gobernador jíin núu tāca rey, te cahān i cuēchi siquī rō siquī jeē cácaandíje ró rúhū. Te súcuan te cuu nacani ró jnúhun ri nuū de.

<sup>10</sup>Te jíni ñúhún jéé xíhna gā cuitē núu jnúhun nuū tācá nación ndese jnáma ri i, te sáá te ndíhi quivī.

<sup>11</sup>Te núu ni cajnií de róhó cuángoo de jíin ró nuū tāca tóhō, te ma nácani ni rō xíhna gā ndese stíó cuíñí rō nuū de te cācu ró. Chi máá hora un te máá Yaā Dios cuāha ya jnúhun nuū rō ndese cahān rō, te jnúhun ún cahān rō. Chi nasūu máá ró cúu jeē cahān, chi Espíritu Santo cúu jeē cahān. <sup>12</sup>Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni. <sup>13</sup>Te tāca ñáyuu quitī ni i nuū rō jeē siquí ruhū. Te ñayuu cuiñi nihin jíin jnúhun ri nde quivī jínu, chi cācu i.

<sup>14</sup>Te Daniel, tēe ni nacani jnúhun Yaā Dios, ni tee de jnúhun iin tēe néé jéé quíji. Te róhó jéé cácahu tutu ún, na jécūhun ni rō. Chi iin quivī te cuni rō jeē sáha ndevāha de jeē stívi de tācá ndajniñu ii ini templo, te cuiñi de nuū tú na ley

cuiñi de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. <sup>15</sup>Te ñayuu cáyūcu núu quéhe, ma ndívi i ini vehe jeē quénehen i ndajniñu i, chi cánúú cunu yachí i návāha cācu i. <sup>16</sup>Te ñayuu cáhiin nuū itu, ma ndíji i vehe jeē quíhlin i sahma i. <sup>17</sup>Te quivī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachí ña. <sup>18</sup>Te cacān tahú rō jeē ma quíji jnūndóho un jéé cunu ró máá tiempo cúun yuhvā. <sup>19</sup>Chi jeē quejéé un te coo cuehē jnūndóho xeēn, jeē ná tu coo súcuan nde quivī ní sáha Yaā Dios ñayiví te nde vijna. Te jeē ndíhi jnūndóho ún te ni ma cóo ga jeē súcuan. <sup>20</sup>Te núu tú nastíyi máá Jítóho yō Yaā Dios tiempo jnūndóho ún, te ni iin ñayuu ma cácu cuiti i. Te jeē siquí ñáyuu cácaandíje jeē ní nacāji ya, jeé yúcuu nastíyi ya tiempo un.

<sup>21</sup>Núu súcuan te núu iin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i. <sup>22</sup>Chi canecoo tēe cástáhú te cahān de jeē Cristo cúu de, chí cáhān de jeē tēe nácani jnúhun Yaā Dios cúu de. Te sáha de jniñu jéhu jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. <sup>23</sup>Te ndito na cóo ni rō, chi je ni castūhun rí nuū rō vijna nde ná tu coo.

**Ndese coo quivī ndiji Yaā ní nduu tēe**

(Mt. 24.29-35, 42-44; Lc. 21.25-36)

<sup>24</sup>Te quivī ún, núu je ni ndíhi jnūndóho ún, te kujnúú níandii, te

yoō ma ndíi gā. <sup>25</sup>Te ńingoo quĩmi ĩn andiví. Te tāca jēē ĩn andiví chi quisi i. <sup>26</sup>Yūcuán na te coto ñayuu nuū maá rí, Yaā ní nduu tēe, ndiji ri jín vico, te condiso ri cuehē poder, te yōhyo luu cujéhu ri. <sup>27</sup>Yūcuán na te tají rí ndajéhé rí quinastútú yá ñayuu ní nacāji ri ndicúun lado ñayiví, nde nuū ndíhi ñayiví te nde nuū ndíhi andiví.

<sup>28</sup>Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jēē jé ni cuyajni tiempo jihní. <sup>29</sup>Te suni súcuan núu ni cajini rō jēē ní quejéé cúu tācá jniñu jēē ni cáhān rí, yūcuán na te na jécūhun ni rō jēē ní cuyajni quiví ndiji ri, te yachí coo. <sup>30</sup>Jendaá cahán rí jín ró jēē ma cúu ndíhi ñayuu jēē cóto jnūndóho ún, chi nde squícu ndíhi jniñu ún. <sup>31</sup>Andiví jín ñáyiví chi naa, te tāca jnúhun cáhān rí chi ma náa, chi ndíhi squícu.

<sup>32</sup>Te quiví jín hora jēē ndíji ri, tú ni ĩn ñayuu jini, ni máá ndajéhé cáhiyo andiví, ni máá rí, Sēhe Yaā Dios. Chi máá ĩn ni Tátá rí cúu jēē jini.

<sup>33</sup>Núu súcuan te na cócūhun ni rō tāca jnúhun yáha, te ndito na cóo ni rō, te cacān tahú rō, chi tu cájini rō na quiví ndiji ri. <sup>34</sup>Chi coo nájnūhun ĩn tēe jēē quihín jicá de, te nde ná tu quenda de vehe de, te ni ndacu de jniñu nuū tāca mozo de ndese sáha ĩn ĩn de. Te ni ndacu de jniñu nuū tēe ndito yéhyí jēē na cóndito de. <sup>35</sup>Te suni súcuan rōhó jijnáhan ró, ndito na cóo ni rō. Chi cúu ri nájnūhun jitohe vehe ún, te tu cájini rō na hora ndiji ri, á jēē cuácuaa, chí ñuú, chí jēē cána líhli,

chí jénéhen. <sup>36</sup>Chi ĩn sanaa-ni te ndiji ri, te coto ró jēē ma nánihín rí rohó jēē tu ndito ró. <sup>37</sup>Te jnúhun cáhān rí jín ró jijnáhan ró, suni cáhān rí jín ndivii ñayuu: Ndito na cóo ni rō jijnáhan ró. Achí yá.

### Jeē ní casqujínáhan de jnúhun jēē jnií de Jesús

(Mt. 26.1-5; Lc. 22.1-2; Jn. 11.45-53)

**14** Te cúmaní uū gā quiví te quejéé vico pascua jēē cáyeji ñayuu hebreo pan jēē tú na levadura yáhi. Te sutú cácujuhnu jín tēe cástéén tutu ley, ni canducú de modo ndese jnií de Jesús jín jnúhun stáhú, te cahni de ya. <sup>2</sup>Te ni cacahān de:

Ma jní yó de máá quiví vico, chí ndonda ñayuu siquí yō, achí de.

### Jnúhun ñahan jēē ní chuhun perfume xiní yā

(Mt. 26.6-13; Jn. 12.1-8)

<sup>3</sup>Te íne Jesús ñuu Betania vehe Simón, tēe ni ndoho cuehyí stehyú. Te níni yéji yā staa, te ni quee ĩn ñahan nuū yā, ndáhá ña ĩn frasco yuū luu jēē ñúhun aceite perfume, jēē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xiní yā. <sup>4</sup>Te sava tēe cáhiin yūcuan ní caquití ni de, te ni cacahān de:

¿Najehē cúu jēē náa saá-ni perfume jina? <sup>5</sup>Chi cuu xicó yahu yó víhyá gā uní ciento denario, te cuāha yo núu ñayuu ndahú núu, áchí de.

Te ni cacahān sōo de jín ña.

<sup>6</sup>Te ni cahān Jesús:

Ma stáhān rō ña. ¿Naun casáha ró jēē nácani uhū ni ña? Chi ĩn jniñu



váha cúu jeē ni sáha ña jíin rí. <sup>7</sup>Chi níní coyūcu ñayuu ndahú jíin ró, te núu cácu ni rō te cuu sáha vāha ró jíin i. Te ruhū chi tuá condee rí jíin ró. <sup>8</sup>Chi ni sáha ña ndihí jeē cuu sáha ña jeē maní ña jíin rí. Chi nde ná tu quindūji ri te je ni sātūhva ña ruhū jeē ní chuhun ña perfume ruhū. <sup>9</sup>Jendaá cahán rí jíin ró jeē ní cáhnu ñayīvi ndé-ni cúu nuū cuité núu jnūhun jeē jnáma ri ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

### Jeē ní nastúu Judas yā

(Mt. 26.14-16; Lc. 22.3-6)

<sup>10</sup>Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñnu, ni sándaā de jíin jēe nastúu de Jesús nuū jijnáhan. <sup>11</sup>Te nuū ní cajini sōho sutū un jēe cahán de, te ni cacusiñ ni, te ni cajejnūhun jeē cuáha xūhun núu de. Te nde quivī un ní nducú de modo ndese nastúu de ya.

### Jeē ní jequín yā Cena yā

(Mt. 26.17-29; Lc. 22.7-23;

Jn. 13.21-30; 1 Co. 11.23-26)

<sup>12</sup>Te ni quee máá quivī jeē quejé vico pascua jeē cáyeji ñayuu pan jeē tú na levadura yáhi, te suni quivī un cájehni i londe nájñūhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajñūhún de ya:

¿Ndé nuū cuní ni jēe quisátūhva ná cuxíni ní vico pascua? achí de.

<sup>13</sup>Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quiyi

ndute. Te condiquin rō de quihín rō jíin de. <sup>14</sup>Te vehe jeē ndívi de, yūcuán cáhán rō jíin tēe chí vehe: Achí máá Maestro: ¿Ndé ñin cúu cuarto vehe ní cuáha núu ní núu cuxíni ya vico pascua jíin tēe cáscuáha jíin yá? achí rō. <sup>15</sup>Te máá de stéén de ñin cuarto cáhnu nde xiní véhe jeē je íyó tūhva. Te yūcuán sātūhva ró jēe cuxíni yó, áchí yá jíin de.

<sup>16</sup>Te cuangoo tēe cáscuáha ún, te ni jinūcoo de ñuu, te ni canihín de nájñūhun ni cahán yā jíin de. Te ni casátūhva de jeē cuxíni ya vico pascua.

<sup>17</sup>Te jeē cuácuaa, te ni quee ya jíin ndihúxí uū de. <sup>18</sup>Te ni cacucōo de mesa cáyeji de staā, te ni cahán yā:

Jendaá cahán rí jíin ró jeē ñin rōhó jēe yéji jíin rí, nastúu ro rúhū, achí yá.

<sup>19</sup>Yūcuán na te ni cacucuíhyá ni de, te ná ñin ná ñin de ni cacajñūhún de ya:

¿A sáña cúu? áchí ñin de.

Te suni súcuán inga de:

¿A sáña cúu? áchí ñin ñin de.

<sup>20</sup>Te ni cahán yā jíin de:

Ñin jeē uxí uū rō jeē cáyeji cáhnu jíin rí ñin cohō, suu nastúu ruhū.

<sup>21</sup>Te ruhū, Yaā ní nduu tēe, jendaá cúu jeē quihín rí cuu rí, nájñūhun yósó jnūhun ri nuū tútu ii. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

<sup>22</sup>Te níní cáyeji de jíin yá, te ni quihín ya pan, te ni nacuatáhú yá, te ni tahú cuéchí yá, te ni jēhe ya nuū tēe cáscuáha jíin yá. Te ni cahán yā:

Caji rō jijnáhan ró, chi yāha cúu yiqui cúñu rī, achí yá.

<sup>23</sup>Yūcuán na te ni quihin ya iin copa ndūxi uva, te ni nacuatáhú yá, te ni jēhe ya ni cajihi ndihi de. <sup>24</sup>Te ni cahān yā jín de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. <sup>25</sup>Te jendaá cahán rī jín ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Yaā Dios jniñu nñ ñayiví, te sáa te coho tucu ri jín ró jijnáhan ró. Achí yá.

**Jeē ní cachi yā jeē yūhu Pedro cahān de jeē jiní de ya**

(Mt. 26.30-35; Lc. 22.31-34; Jn. 13.36-38)

<sup>26</sup>Te ni jita ya iin yaa iī jín de jijnáhan de. Te ni quenda ya cuahān yā jín de nde yucu Olivos. <sup>27</sup>Yūcuán na te ni cahān yā:

Ndivii rō nayūhu ró jeē siquī ruhū jecuāā vijna. Chi suhva je yósó jnúhun ri nuū tútu iī, ni cahān Yaā Dios: Cuáha ri jnúhun jeē cáhni ñayuu tēe ndíto lanchi, te lanchi un cuítē núu tí jeē yūhu tí, achí. <sup>28</sup>Te jeē nátecu rī, te xihna ruhū cosnúu rí quihin rī región Galilea, te sáa te najinūcoo ró, achí yá.

<sup>29</sup>Yūcuán na te ni cahān Pedro: Vēsú ndihi de na náyūhú de, te máá ná chi ma náyūhú cuítī ná, achí de jín yá.

<sup>30</sup>Te ni cahān yā jín de:

Jendaá cahán rī jín ró jeē jecuāā vijna, nde ná tu cana líhli uū jínu, te yūhu ró jeē jniñ ñayuu rohó, te unī jínu cahān rō jeē tu jín rō ruhū, achí yá.

<sup>31</sup>Te ni cahān teyí de jín yá:

Vēsú núu cuu na jín ní, te ma cahán cuítī na jéē tu jín na níhín, achí de.

Te suni súcuan ni cacahān ndihi de.

**Jeē ni jicān tahú yā nuū huerto Getsemaní**

(Mt. 26.36-46; Lc. 22.39-46)

<sup>32</sup>Yūcuán na te ni jinū Jesús jín tēe cáscuáha jín yá iin lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī cacān tahú rī, achí yá.

<sup>33</sup>Te ni jeca ya Pedro jín Jacobo jín Juan, cuahān yā jín de. Te ni quejéé yá cucuíhyá ndasí ni yā te cúxí ni yā jeē quíji jnūndóho siquī yā. <sup>34</sup>Te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró, achí yá.

<sup>35</sup>Te ni jica ya jecu gā, te ni jecuñī yití yá ni jequin ya nuū yā nuū nūhun. Te ni jicān tahú yā nuū Yaā Dios jeē núu cuu te ma ndóho ya jnūndóho jeē quejéé quiji siquī yā. <sup>36</sup>Te suhva ni cahān yā:

Tátá maá ná, ndihi-ni jniñu cuu sáha máá ní. Te tejiyo ní jnūndóho yáha jéē ma quíji siquī ná. Te nasūu jéē cuní maá ná, chi jeē cuní maá ní na cóo, achí yá.

<sup>37</sup>Te ni ndee yā nuū ndinúní tēe cáscuáha jín yá, te ni jito ya jeē cáquixí de. Te ni cahān yā jín Pedro:

Simón, ¿á quíxí rō? ¿A tu ní cánda ró condito ró jín rí vēsú iin hora? <sup>38</sup>Coo ndito ni rō te cacān tahú rō jeē chindéé ñáhán yá rohó jeē ma sáha ró cuéchi jeē coto ndee jeneé róhó. Chi cuní ndije ánuá rō squícu vāha ró, te yiqui cúñu rō chi tu fuerza, achí yá.

<sup>39</sup>Te ni jehēn tucu ya, ni jicān tahú yā, te suni jnūhun yúcuan ní cahān yā. <sup>40</sup>Te ni ndee ya nuū de, te ni jito ya jeē cáquixi tucu de, chi yōhyo cájii de māhná. Te tuá ni cánihīn de jnūhun stío cuñí de nuū yā. <sup>41</sup>Te ni ndee yā jeē vuelta unī, te ni cahān yā jíin de:

Vijna te cusū rō te ndetātu rō. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jniī tēe cáhiyo cuēchi ruhū. <sup>42</sup>Ndocuiñi jijnáhan rō, chi je vēji tēe nastúu ruhū, te quihīn yō jíin de. Achí yá.

### Jeē ní cajniī de Jesús

(Mt. 26.47-56; Lc. 22.47-53; Jn. 18.2-11)

<sup>43</sup>Te sá cáhán gā yā súcuan, te ni quee-ni Judas, iin jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin tēe cástéén tutu ley jíin tēe jéñnu cándacu jniñu, ni catají de tēe ún. <sup>44</sup>Te Judas, tēe nástúu ya ún, je ni jēhe de iin seña nuū tēe un jijnáhan, chi ni cachi de:

Tēe jeē téchūhu rí un cúu. Te jniī rō jijnáhan rō quihīn rō jíin, te ma siaá cuiti rō, achí de.

<sup>45</sup>Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. <sup>46</sup>Te tāca gá tēe un ní cajniī de ya, te cuango de jíin yá.

<sup>47</sup>Te iin tēe íne jíin yá ni tava de espada de, te ni jehnde de sōho iin mozo maá sūtū cujeñnu ga. <sup>48</sup>Te ni cahān Jesús jíin ñáyyu cuehē ún:

¿Te va tēe cuíhná cúu ri jeē vējicoo rō jíin espada jíin yujnu jniī

ró rúhū jeē súcuan? <sup>49</sup>Tāca quívī ni ine ri jíin ró jijnáhan ró ini templo cáhnu, ni steén rī jnūhun, te tu ní cájniī ró rúhū. Te súcuan cásaaha ró návaha na squícu jeē cahán tutu iī, achí yá.

<sup>50</sup>Yūcuán na te ndihi tēe cáscuáha jíin yá, ni castóo de ya, ni cajinu de cuango de.

### Tēe suchí jeē ní jinu

<sup>51</sup>Te iin tēe suchí, ndíquín de ya cuahān de jíin yá. Te ndiī de máá iin sahma cuitá. Te ni cajniī tēe ún de. <sup>52</sup>Te máá sahma cuitá un ní canihīn. Te ni jinu máá ñiī-ni de cuahān de.

### Jeē ní indichi Jesús nuū junta tēe cácujeñnu ga

(Mt. 26.57-68; Lc. 22.54-55, 63-71; Jn. 18.12-14, 19-24)

<sup>53</sup>Yūcuán na te ni jinūcoo de jíin Jesús nuū sutū cujeñnu ga. Te tāca sūtū cácujeñnu jíin tēe jéñnu cándacu jniñu jíin tēe cástéén tutu ley, ni candutútú de. <sup>54</sup>Te Pedro chi jícá-ni ndíquín de ya, te ni jinū de nde ini patio sutū cujeñnu ga. Te ni cucōo de jíin táca policía, násaā de ñuhūn.

<sup>55</sup>Te sutū cácujeñnu jíin ndihi tēe cásaaha junta cujeñnu ga, ni canducú de cuēchi siquī Jesús, chi cahni de ya cácuni de. Te tu ní cánihīn de. <sup>56</sup>Chi cuehē de ni cacahān yaá siquī yā, te tu ní quíjnáhan jnūhun ni cacahān de.

<sup>57</sup>Yūcuán na te ni candocuiñi sava de, te ni catee de cuēchi siquī yā, achí de:

<sup>58</sup>Máá ná ni cajini ná cáhán de jeē canu de templo yáha jēē ní cuvāha

ni casáha tēe, te nuū uní quivī te nacani de inga jeē násūu jíin ndaha tēe cuvāha, áchí de. Achí jíináhan.

<sup>59</sup>Te ni jnūhun yáha tu ní quíjnáhan tucu jeē cácahān de siquī yā.

<sup>60</sup>Yūcuán na te sutū cujéhnū ga ni ndocuiñī de nuū ñáyuu cuehē ún, te ni cajnūhún de Jesús:

¿Naun tu cáhán cuiti rō? ¿A íyó ndáa jeē cácahān tēe yáha síquī rō? achí de.

<sup>61</sup>Te máá yá tu ní cáhán cuiti yā, chí tú na vé ni stío cuñí yā. Te sutū cujéhnū ga ni cajnūhún tucu de ya:

¿A máá ró cúu Cristo, Sēhe Yaā vāha jeē cujéhnū? áchí de jíin yá.

<sup>62</sup>Te ni cahān yā:

Suu ri cúu. Te coto ró jéē ruhū, Yaā ní nduu tēe, condee rī lado vāha Yaā iyó poder, te ndiji ri ichi ándiví jíin vícō, achí yá.

<sup>63</sup>Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

¿Ndé jíni ñúhún gá yō testigo núu súcuan? <sup>64</sup>Chí je ni cajini ró jéē cahān de jnūhun ndevāha jeē quití ni Yaā Dios, chí sáha de máá de Sēhe Yaā Dios. ¿Te ndese cájeni ni rō? Achí de.

Te ndihi de ni cacahān jeē na cúu yā.

<sup>65</sup>Te sava de ni catesihí de nuū yā, te ni cajesí de sahma nuū yā, te ni cacani de ya. Te cácahān de jíin yá:

Cachi ndé ñin cúu jeē ní cani rōhó, áchí de.

Te tāca tēe policia ni cacani de nuū yā.

### Jeē ní cachi Pedro jeē tu jíni de ya

(Mt. 26.69-75; Lc. 22.56-62;

Jn. 18.15-18, 25-29)

<sup>66</sup>Te íne Pedro ini patio ichi chíji nuū cáhiin de jíin Jesús. Te ni quee

ñin ñahan jéjnīñu vehe sutū cujéhnū ga ún. <sup>67</sup>Te ni jito ña nuū de jeē néne de násaā de yuñúhún. Te ni

jito vāha ña nuū de, te ni cahān ña:

Róhó chí suni ní jica ró jíin Jesús, tēe ñuu Nazaret, achí ña.

<sup>68</sup>Te máá de tu ní cáchi de, chí ni cahān de:

Tu jíni rī de, ní tu jíni rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli. <sup>69</sup>Te ñahan jéjnīñu un ní jito tucu ña nuū de, te ni quejéé ña cáhán ña jíin ñáyuu cáhiin yūcuán:

Tēe yáha suni jnáhan tāca tēe un cúu, achí ña.

<sup>70</sup>Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jíin Pedro:

Jendaá ndije jeē suni jnáhan de cúu ró, chí tēe Galilea cúu ró, te ñnuú-ni cáhán rō jíin de jíináhan de. Achí i.

<sup>71</sup>Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíni rī tēe un jéē cácahān rō jnūhun de, achí de.

<sup>72</sup>Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jínu, te yūhu ró te cahān rō uní jínu jeē tu jíni rō ruhū. Te ni nacani ní de siquī jnúhun ún, te ni ndahyū de.

### Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

**15** Te jeē ní cundijin, te sutū cácujehnū ni candutútú de jíin tēe jéhnū cándacu jniñu,

jiín tée cástéén tutu ley, jiín ndihi tée casáha junta cujéhnú ga, te ni casquijnáhan de jnūhun. Te ni cajihni de Jesús, te cuango de jiín yá nuū Pilato, tée cúu gobernador.

<sup>2</sup>Te Pilato ni cajnūhún de ya: ¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájñūhun cáhán rō.

<sup>3</sup>Te sutū cácujuhū un ní cacahān de cuehē cuēchi siquī yā. <sup>4</sup>Te Pilato ni cajnūhún tucu de ya:

¿Naun tu cáhán cuíti rō? ¿A tu jini ró jēē cuehē cuēchi cácahān de siquī rō? achí de.

<sup>5</sup>Te tu ní cáhán cuíti yā ni iin jnūhun jiín de. Te nahán ní naa ni Pilato ndéhé de nuū yā.

#### Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

<sup>6</sup>Te íyó costumbre Pilato jeē quivī víco un siaá de iin tēe íne vecāa, núu na-ni tēe cácuñi ñayuu. <sup>7</sup>Te íyó iin tēe nání Barrabás, íne de vecāa jiín táca jnáhan de siquī jeē ní candonda de siquī tohō te ni cajehni de ndīyī. <sup>8</sup>Te ni quecoo ñayuu cuehē, te ni cacahān i jiín Pilato jeē na sáha de nájñūhun íyó costumbre de. <sup>9</sup>Te ni cahān Pilato jiín i:

¿A tu cácuñi rō jeē siaá ri tēe cúu Rey rohó ñayuu hebreo? achí de.

<sup>10</sup>Súcuan ni cahān de, chi cúni de siaá de Jesús. Chi je ni jecūhun ni de jeē ní cacucésún ni tāca sūtū un cájito de ya, te jeē yúcuan ní quijicoo jiín yá nuū de. <sup>11</sup>Te sutū cácujuhū un ní cascáhán de ñayuu cuehē un jēē váha ga na cácan i jeē siaá Pilato Barrabás. <sup>12</sup>Yūcuán na te ni cajnūhún tucu Pilato:

Núu súcuan ¿te ndese cácuñi rō jeē sáha ri jiín tēe jeē cácahān rō jeē cúu de Rey rohó ñayuu hebreo? achí de jiín i.

<sup>13</sup>Te ni cacana jee i:

Cata caa ní de jicā cruz, na cúu de, achí i.

<sup>14</sup>Te ni cahān Pilato:

¿Na cuēchi ni sáha de núu súcuan?

Te ñayuu un ní cacana jee tucu i:

Cata caa ní de jicā cruz, na cúu de, achí i.

<sup>15</sup>Te Pilato cuní de jeē na cúsiñ ni ñayuu jiín de, te ni siaá de Barrabás. Yūcuán na te ni ndacu de jniñu jeē na cáni tācá soldado Jesús, jiín jēē cata caa de ya jicā cruz.

<sup>16</sup>Yūcuán na te soldado un cuango de jiín yá ini patio palacio, jeē sácata de nuū yā. Te ni canastútú de ndihi jnáhan de. <sup>17</sup>Te ni cachuhun de ya iin sahma cuehé ndíhí jēē cúu sahma rey. Te ni casáha de iin corona iñu, ni cachuhun de xiní yā.

<sup>18</sup>Yūcuán na te ni cacana de:

Nacā jeē váha rey cúu Rey ñayuu hebreo, achí de.

<sup>19</sup>Te ni cacani de yujnu xiní yā, te ni catesihí de nuū yā, te ni cajecuiñí yití de nuū yā, casáha de jeē chiñúhún de ya. <sup>20</sup>Te nuū ní cuu ni casácata de nuū yā, te ni catava de sahma cuehé ndíhí un, te ni canachuhun de ya sahma máa yá. Te ni caquenehen de ya jeē cata caa de ya jicā cruz.

#### Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

<sup>21</sup>Te iin tēe nání Simón ñuu Cirene, tēe cúu tátá Alejandro jiín Rufo, vendiji de jeē ni jéhēn de rancho. Te ni yāha de yūcuán, te ni

catejníñu soldado un de jeē cóndiso de cruz yā.

<sup>22</sup>Te cuango de jíin yá iin lugar nuū naní Gólgota, jeē cuní cahān Lugar Yiqui Xíní. <sup>23</sup>Te ni cajēhe de vino jeē ni sácā núu jíin súje uvuā jeē cóho ya, te tu ní jíhi ya. <sup>24</sup>Te ni cacata caa de ya jicā cruz. Te ni casáha de sorteo jeē siquí ndese nihīn iin iin de sahma ya.

<sup>25</sup>Te cahīn ni cacata caa de ya.

<sup>26</sup>Te jnūhun ni catee de xinī cruz cahán na siquí ni jihī yā: Yāha cúu Rey ñayuu hebreo, achí. <sup>27</sup>Te suni ni cacata caa de uū tēe cuíhná núu uū gā cruz, iin de lado váha ya, te inga de lado jecó yá. <sup>28</sup>Te ni squícu jnūhun cáhán tutu iī: Ni casquínáhan de ya jíin tēe cásáha neé, áchí.

<sup>29</sup>Te ñayuu cáyāha yūcuán cáscuicó i xinī i, te cácahān neé i:

Jājaān. Róhó chi cáhán rō jeē cánu rō templo cáhnu, te nuū uní quivī te nucondichi sáha ró. <sup>30</sup>Núu súcuan te jnama ró máá ró, te nuu ró jicā cruz vii, achí i.

<sup>31</sup>Te suni súcuan ni cacahān catá sutū cácujeñhu jíin tēe cástéén tutu ley, te áchí de cácahān maá de:

Núu inga ñayuu ni jnama de, ¿te naun tu cúu jnama de máá de vijna? <sup>32</sup>Núu na cúní yō jeē Cristo, Rey ñayuu Israel, nuu de jicā cruz vijna, yūcuán na te candíje yó, áchí de jíjnáhan de.

Te tēe cándita caa jíin yá, suni súcuan ni cacahān neé de.

### Jeē ni jíhi Jesús

(Mt. 27.45-56; Lc. 23.44-49; Jn. 19.28-30)

<sup>33</sup>Te nuū ní cuu cahuxī uū, te ni cunee ní cáhnu nde cahunī. <sup>34</sup>Te

nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jnūhun un cúní cahān: Yāa Dios maá ná, Yāa Dios maá ná, ¿naun ni stóo ní sáña?

<sup>35</sup>Te sava ñayuu cáhiin yūcuan, ní cajini i jnūhun ún, te ni cacahān i:

Cuni nahín, chi cána de xinī Elías, tēe ni nacani jnūhun Yāa Dios jenahán, achí i.

<sup>36</sup>Te ni jinu iin tēe, ni jechundaji de cachí nuū vinagre iyá. Te ni tee de xinī iin yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, áchí de.

<sup>37</sup>Te máá Jesús ni cana jee ya, te ni jihī-ni ya. <sup>38</sup>Yūcuán na te sahma ndíta caa jeē ndihyú cuarto iī ini templo cáhnu, ni ndatā sava sava nde xinī te nde nuū jehé. <sup>39</sup>Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yāa Dios cúu tēe yáha, áchí de.

<sup>40</sup>Te suni cáhiin sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé. <sup>41</sup>Te ñahan yáha ní candiquin ña ya, ni cajejníñu ña nuū yā nde náa jíca ya Galilea. Te suni cáhiin cuehē gā ñahan jeē ni jéngoo jíin yá ñuu Jerusalén.

### Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

<sup>42</sup>Te ni ini quivī ún. Te quivī sátūhva cúu, chi sajnē cúu quivī ndétātū. <sup>43</sup>Te ni quee José, tēe

ñuu Arimatea. Te cúu de ñn tēe cújéhnú nuū junta cújéhnú ga. Te suni ñúhun ni de jeē quíjī quíivī jeē ndacu Yaā Dios jniñu. Te tu yúhú de chi ni quíivī de nuū Pilato, ni jicān de yiquí cúñu Jesús. <sup>44</sup>Te Pilato chi náā ni de jeē yachí ni jihí yā. Te ni cana de capitán, te ni cajnúhún de tēe un núu je ni jihí yā. <sup>45</sup>Yūcuán na te ni cucáhnú ni de jeē ni cáhān capitán jíin de, te ni jēhe de jnúhun jeē quihin José yiquí cúñu yā. <sup>46</sup>Te José ni jeen de ñn sahma cuitá váha. Te ni snúu de yiquí cúñu yā, te ni chusúcún de sahma ún. Te ni chindúji de ya ini ñn yaū jeē quíndúji ndíyī, jeē ní caan jicā ñn cava. Te ni jesi de ñn yuū yuhu yáú un. <sup>47</sup>Te María ñnu Magdala, jíin María naná José, ni cajito ña nuū ní cachindúji de ya.

### Jeē ní natecu Jesús

(Mt. 28.1-10; Lc. 24.1-12; Jn. 20.1-10)

**16** Te ni ini quíivī ndétátú, te María ñnu Magdala, jíin María naná Jacobo, jíin Salomé, ni cajeen ña tācá perfume jeē quíchuhun ña yiquí cúñu yā. <sup>2</sup>Te jenéhen quíivī domingo, jeē ní cane niāndii, te ni jinūcoo ña nuū ní yíndúji ya. <sup>3</sup>Te cácahān ña:

¿Ndé níhīn yō tēe tejíyo yuū ndihyú yuhu yáú? áchí ña.

<sup>4</sup>Te ni candacoto ña, te ni cajito ña jeē jé ni cujíyo yuū cáhnú un cuáhān. <sup>5</sup>Te ni quíivicoo ña ini yaū ndíyī. Te ni cajito ña ñn ndajéhé Yaā Dios jeē cáa nájnūhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña. <sup>6</sup>Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñnu Nazaret, Yaā ni jíhī jicā cruz. Tuá yā yāhá, chi je ni natecu yā. Yāhá condéhé ró nuū ní cachindúji de ya. <sup>7</sup>Cuánungoo te cachi rō nuū tēe cáscuáha jíin yá, jíin núu Pedro, jeē xíhna gā maá yá jinū Galilea, te sáá te najínūcoo de. Te yūcuán coto de nuū yā, nájnūhun ni cahān yā jíin de nde saá, áchí yá jíin ña.

<sup>8</sup>Yūcuán na te ñahan un ní quendacoo ña nuū ní yíndúji ya, te cájínú ña cuangoo ña. Chi quísi i ña jeē cáyūhú ña. Te tu ní cácachí cuití ña nuū ní ñn, chí cáyūhú ña.

### Jeē ní nane Jesús nuū María ñnu Magdala

(Jn. 20. 11-18)

<sup>9</sup>Te Jesús ni natecu yā jenéhen quíivī domingo. Te xíhna gā ni nane ndijin yā nuū María ñnu Magdala, ñahan jeē ní quenehen ya uxā tachí ini. <sup>10</sup>Te cuahān ña cuacastūhún ña nuū tāca tēe ni cajica jíin yá jeē ní nane ya nuū ña. Te cáccucuíhyá ni de te cándahyū de. <sup>11</sup>Te nuū ní cajini de jnúhun jeē ní jito ña nuū yā jeē tēcu yā, te tu ní cácandíje de jnúhun cáhān ña.

### Jeē ní nane ya nuū uū tēe cáscuáha jíin yá

(Lc. 24.13-35)

<sup>12</sup>Yūcuán na te ni quendacoo uū jnáhan tēe ún, cájica de cuahān de ichi rancho, te sñn modo ni nane ndijin yā nuū de. <sup>13</sup>Te ni canandicó de, ni cacastūhún de nuū tāca gá jnáhan de. Te ni tu ní cácandíje tucu jnáhan de jeē cácahān ndíndúú de.

**Jeē ní tejníñu ya de nacani de  
jnūhun**

(Mt. 28.16-20; Lc. 24.36-49; Jn. 20.19-23)

<sup>14</sup>Te cúcuéé gá te ni nane ndijin yā nuū ndihúxí iin de jeē cáyūcú de mesa cáyeji de staā. Te ni cahān yā nuū de, chi nihni ni de jeē tu cá candíje de jeē cácahān jnáhan de un, jēē ní natecu yā ni cajito de ya.

<sup>15</sup>Te ni cahān yā jiín de:

Cuángoo jíjnáhan ró níí ñayīví, te nacani ró jnúhun ri nuū tāca ñáyuu ndese jnáma ri i. <sup>16</sup>Te ñayuu candíje te cuandute i, chi cācu i. Te ñayuu tú candíje, chi jnahnū ndetū i. <sup>17</sup>Te ñayuu candíje, sáha i tācá jniñu jéhnū yáha jeē steén jeē iyó rí jiín i: Jíín síhví rí quenehen i tachī ini ñayuu. Te cahān i tijní yuhu jéé.

<sup>18</sup>Te núu ni jnií sanaa i coō, chí núu ni jihí i veneno, te ma sáha dañó jiín i. Te suni soó i ndaha i siquī ñáyuu cácuñū, te nduvāha. Achí yá jiín de.

**Jeē ní ndaa ya cuanuhun yā andiví**

(Lc. 24.50-53)

<sup>19</sup>Yūcuán na te nuū ní ndihí ni cahān máá Jítóho yō jiín de jíjnáhan de, te ni ndaa ya cuanuhun yā andiví, te ni cucōo ya lado váha Yāā Dios nuū cujéhnū ya. <sup>20</sup>Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnū jeē steén jeē iyó ndāā jnūhun cānacani de. Te ni cuu. Amén.